

2 KORIN

Mi iya Pol siya nu Maesedonia hir nwowa mi siya ta yokwowa ha winkikin iikamim naingwo tibmiiyim om komii Korin hiranim simiiram. Mi iya Taitas siya om Korin hir haiburgigin mi siya ha nitkin nu Masedonia tiriirin Pol siiram mi siya om Korin hiran iikamim kimidiniya siir ini boinmimauuu. Mi yokwowa yipiki Pol siya winkiya biya ti iikam imiiram, sima sair mwainim mi simiir nhirim simiir siyu bibiyeyim ina yitkiigiyim. Mi simiir nhirim hiniina bi naingwokim Pol siya Adi Komii siir miyan inkamkin. Niingaka. Mi Pol siya hiriinan kigin mi siya ta yokwowa ha winkin. Mi ta hiriinan sairsika sima wa nwoki aingwowim siya aposel inkam kiingikiingin. Mi iriipi hiriinan siya Korin hiran iikamim simiirin umir haingiriyu haiginam wara mi boinki iki Biyan Inkam Komii siir isid nhirim yipikim paeprikab nwowim simiir whinkinsiis haiginuwim iikamim naingwo tibmiiyim nu Judia hiranim yipiki umir digworaekwo karamae nwowim simiiram. Iriig.

1 ¹Kara Polkin, kara Jisis Krais siir aposel inkamkin mi Kara siir yai imiir boinourwokai haiginuwi. Biyarin Adi Komii krimiir Wanin siya kariir nimbinaamar naingwokin aposel inkam nwowam siir mi aiir miriyam. Mi ta yokwowa kara mi krimiir nomiiyau ieya Timoti krirar winkika kimiiram. Mi tariinanin saeya wi kimiiram niti iikamim Adi Komii siir pugana sairim, wari om Korin hir nwowim. Mi iikamim yipiki Adi Komii siirim, iki hinda tinda nwowim mi Grik nu haimii haimii nhirim simiir hiranim yim iriipi hiriinan. ²Kara ha naingwowi Adi Komiiyin krimiir Adin mi krimiir Biyan Inkam Komii ikin Jisis Krais kimiirin wi sowanii hauuwi naingwobumbu mi iripa nongwomamair ae.

Pol siya Adi Komii siirin minsi boin wadiekikin siirin siya whinkinsiis haiginugin

³Krima Adi Komii siir inig iir hainan prapraski, krimiir Biyan Inkam Komiiyin Jisis Krais siir Adin. Krima ina ninokninkinim, siya krimiir Adgin yipiki, krimiirsi naingwokwonanaeyin, siir bwamki bwamkin. Mi krimiir kwoin imiir whinkinsiis haiginuwam hikim krimiir nimbiniyim simiirsi. ⁴Siya krimiir kwoin imiir whinkinsiis haiginuwikin hikim krimiir nimbiniyim simiirsi warar. Mi hiriinanki nuwi mi nim krima wi iki iikam nhirim sim niki whinkinsiis haiginuwim mi wi simiir

nwoki iisiimauuwim hika simiir nimbiniya sairsi. Mi krima simiirin wa whinkinsis haiginiui, ti dimin taeminim Adi Komii siya whinkinsis haiginiuwim krimiir. ⁵Yim ti diminim simiir bwamkibwamin yio hiniingin, dimin bibiyie whiekakim wi krimiir nimbini, krimiir kimpipisu haiginiuwam ta biya sima tira Kraiis siir sima kimpipisu haiginiuwa saiir hiriinan. Mi ti hiriinan siyiu kaimwowin tiki hikpai hikpaiyim nitim krimiirin wi sima kimbipisu haiginiuwi. Mi ti hiriinan siyiu kaimwowin Kraiis siya wi krimiir whinkinsis haiginiuwi, ti dimin taeminim Kraiis siir wokmai haiginiuwa mi krima wi iikam nhirim simiir wara nwoki wokmai haiginiuwim. ⁶Iikamim dimin biyie Timoti kririir tirkim. Dimusi rani, krira kimiirin Adi Komii siir yai air boinmimauugo kimiirin mi sima ini kimiirar mi whinkinsis haiginiu mi kimiirar mi wokmai haiginiu ta saiir ninokninkinim hiniin, Adi Komii siya wi kimiirar mi whinkinsis haiginiuwi mi mhoiyya siya wi kimiirar mi anmaiwarkainaei. Mi inkamin dimin biyie kimiir tirin mi krimiirin Adi Komii siyar swoki whinkinsis haiginiuwi. Mi sima kinsis haiginiuwi kwoin miyikak nwowim. Dimusi rani, mhoiyya hikpai hikpaiyim nimbini mi kiriirin ha kimbipisu haiginiuwi mi kira ta sairsiyin wa kipi nikwokrimkrip Adi Komii siya wi kariirar whinkinsis haiginiuwi, ta biya siya whinkinsis haiginiuwa kririir saiir hiriinan. ⁷Nikrira iikam kimiirin ina ninokninkinim. Iya hikpai hikpaigi nimbiniyim kimiir kimbipisu haiginiuwam, ti hikim kima ini kriraka mi inkin haiyim. Krira ina ninokninkino, Adi Komii siya kimiirin wa whinkinsis haiginiuwi, kimiir wokmai haiginiuwam, ta Adi Komii siya mi whinkinsis haiginiuwa, kririir wokmai haiginiuwam saiir hiriinan.

⁸Mi nikrira hiriinanar naingwowi, wim kima ti hikpai hikpaiyim kririir nimbiniyim nu komii Esia hir, kima simiirin bidiyar mi inokninkinim. Hikpai hikpaiyim kririir nimbiniyim hindara ninkin iduduraraowi mi ini kririir kirie air haiburim mi krira pariiparii pi naowim. ⁹Krira hiriyar yaingwo, krira wa naowi. Mi iya ti dimin taemin hiriinanim kririir nimbiniyim mi krira pi hiriyar naingwowi, krira wi dig nwo rani, kririirin sima whinkinsis haiginiugin ta saiir ninokninkinim Adi Komiiyin yipiki naokaowim sim hidninsiin idwowin siya siyairgin kririir whinkinsis haiginiuwiyin. ¹⁰Siya kririirin bidiyar mi whinkinsis haiginiuwun ti dimin biyie biyeyim kririir nimbiniyim simiirsi warar mi hiriinan sairsika, krira paniinsi yaosi. Mhoiyya siya kririirin wa swoki whinkinsis haiginiuwi. Krira hiriyar naingwowi, mhoiyya siya wi kririirar swoki whinkinsis haiginiuwi mi wi kririirar mi kigriraowi. ¹¹Ta kima whinkinsis haiginiuwa kririir saiir hiriinan, ta kima kwis boinkiya Adi Komii siiram kririir whinkinsis haiginiuwam, kima wi hiriinan tir. Mi mhoiyya iikam nhirim sima hiriinan wakaei Adi Komii siya dimin taeminim kima kwisboinim siiram, kririir whinkinsis

haiginiuwam, siya simiir bidi wakaeyin mi sama wi siir inig iir hainanprapraskii mi wi hiniina boinkii, siya wadiekin. Iriig.

**Pol siir kwoinin ina swoki kisina haigiyin
mi siya om Korin hiriir bi namkin**

¹²Nikrira ti dimin imiiramin ini maigimaigar mi okiyo kririir kwoinin kririirin hiniina boinkin, tiki miyim ti krira mariiyokiyokiyim iki omom omomim sim mi kimiir waraur, yim wadie kinaigim, Adi Komii siir naeyiun siyar bidi whinkinsiis haiginiuwun kririirin. Kririir siyu iirsiyar ti krira tirin biya iikamim simiir whwonkam ida, yim tiriiginim yim kaimwokinar bidi ywowim. Mi ti nuin siir tiran siyuim ti iikam ima ninokninkiniyin yio kririir bi whinkinsiis haiginiugin ti dimin taeminim simiir tiramin. Niingaka Adi Komii sasairgin kririir whinkinsiis haiginiuwun ti dimin taemin imiir tirim. Krira ti siyu iir napko iya krira iikamim nuanim kimaka waraur nwowa mi krira iikam kimaka ti hiriinan siyu iir asi mi apkripkaigo mi krira ta sairamim maigimaiga prasae bi kinko. ¹³Mi ti yayim ti kara winkiyim kimiiram ta yokwo aiir simiir yaimwokiyaimwowim yim aowa nwo rani. Mi yim kimiiramim minam winkikim kima sibgu ninokninkinim wari yayim kara winkiyim kimiiram mi wari kimar mwaini simaigim. Kara ha naingwowi, kima ti dimin taemin imiirin ina sibgu inokninkinim. Mi tariinanin kima ini inkam krimiirarar niki inokninkinsasaeyim mi an kara ha naingwowi, mhoiyya kima krimiir siyu iirin wi hainiingi sibgu inokninkini. ¹⁴Mi taka iya Biyan Inkam Komiiyin Jisis siya swoki iti mi krimiirin siya swoki anmaiwarkainaei mi krira wi maigimaiga kimaka nwowi, ta kima nwowa Krai saika, saiir hiriinan. Mi kima wi maigimaiga krimiiram nwowi yipiki aposel inkamim yipiki kimiir boinmimauuim ta yai kibie aiir mi kimiir whinkinsiin haiginiuim, ta yaiya saiir yaimwokiyaimwo imiir.

¹⁵Kara hiriyyar naingwokin kima kariiramim wi maigimaiga prasae kin tani. Mi kara biyyin pi hiniina boini, kara kimiiramim wa niti kimiir kignakiiyamim mi kara wi kimiir nwoki whinkinsiis haiginiuwim, idipidip maigimaiga kima nwowam. ¹⁶Mi iya kara kimiir kignakiyam naingwowi, kara namim nu haimii Masedonia hiriir mi mhoiyya nu haimii Masedonia hir haiburgigi mi kara wa swoki iti kimiiramar mi kima wi kariir nwoki whinkinsiis haiginiuwim mi kariirin wa nwoki ikropkiyim nu haimii Judia hiriir mi kara kimiirin wi idipidip asi kigi. ¹⁷Mi kima hiriyyar naingwowi ta iya kara nimbina kimiir kignakiyam kara nonkwowa mi tari kara ti dimin taeminim simiir bi sibgu aingwo omokin mi kariir kwoinin hiriinansi swoki kisina haigigin, ha? Mi kima hiriyyar naingwowi, an kara ini ti nuin siir inkam biyenan ywowin yipiki ti hiriinan boinkiyin, ihii, kara wa niti mi kariir kwoinin kara

hiriinan tiram naingwo rani, yi ini niingakiniingar ywowiskiyin! ¹⁸ Adi Komii siir hiriinan, yio siya iinokiinokin yai mwowar boinanaeikin. Mi an kara iriipi hiriinan iinokiinokin yaimwo imiirarar mi boinikin. Mi kara kimiirin ha bi boinkin kara wi kapi niti mi iya kariir kwoinin ha naingwowi, kara wi nit rani. Kara kimiirin wi hiriinan boin tani niingaka. ¹⁹ Sailas, Timoti mi karar, krima iinokiinokin kimiirin Adi Komii siir yinisimin Jisis Kraiss, siirar boinmimaugun. Kima ina ninokninkinim Kraiss siya dimin sim whir bi swoki imbin miminkin siya tiramin. Mi ta siya boinkiya mi mhoyiya siir kwoinin wi swoki kisina haigi rani. Niingaka. Diminin siya boinim simairgin. ²⁰ Mi ti hiriinan tirim mi ti nimbipai nimbipaiyim yipiki Adi Komii siya boinkiyim yim ini kaimwokina hiriinanar mi imbiyamim. Dimusi rani, krima Adi Komii siir inig iir hainan prapras boinkikim, kirir yaiya ya yai Kaimwo aeyairga. ²¹ Adi Komii sasairgin yipikin krimiir whiekakar whinkinsiis haiginiuwiyin, Kraiss saika nwirua nwowam. ²² Krimiirin Adi Komii siyar nimbingin siyamar mi siir naeyiun siirin siyar mi haigi haiginiu krimiir kwoinuin mi ti dimin sim hiriinanin krimiirin siyar mi hauu krimiir niisiimauuwam hiniin, mhoyiya siya wi krimiir hauuwi dimin taeminim.

²³ Mi kara ti digworaekwowim simiir nikssaei, Adi Komii siya kariir kwoin iirin ina ninokninkinin mi ti siirin wi siyar ninokninkin haiginiuwu. Mi kara ti dimin taemin imiirin kaimwovar boinkii. Kara biyyin om Korin warauran iikamim kimiir bi nini kignikim, nu haimeii Masedonia tirankin kara bi nitkin. Dimusi rani, kara iikam kimiirin io nwowim pi boriisopi wim wi yaimwo whwonkamim niigi niiga pi nwowisi. ²⁴ Krima kimiirin ti hiriinan bi boinkim, krima kimiirin ti digworaekwowim Adi Komii siirim kima naingwo tibmii kiinim simiir warar ninkin kigirkaki. Niingaka krima ta saiirin ina ninokninkinim kimiir naingwo tibmiiya Adi Komii siiram naingwo tibmiiya ya ini ywowa. Mi nim krima, kimaka minam mirii, maigimairga kimiir nwowaiginiuwim mi kirie nwowim. Iriig.

2 ¹ Mi ta hiriinan saiirsika, kara ha naingwowi kara wi kimiiram waraur swoki it rani kima naingwoyimyoksi mi hikak kima nwosi. ² Mi kara kimiir kwoin iir kiyopsibgi haiginiuwu io whwonkam kima nanaowam mi kariirin wi nhinga tiri, maigimairga kara nwowamin? Niingaka. Kara ti iikamim simiir kwoin imiir kiyopsibgi haiginiuwim pi boriisopi io whwonkam sima nanaowim, yipiki iinokiinok kariir nwowaiginiuwiyim maigimairga. Niingaka. ³ Kara iikam kimiir nini kignakiyim pi boriisopi an wi maigimairga karamae kima pi nwowaiginiuwisi. Kara ha naingwowi, kima kariirin hiriinanar whinkinsiis haiginiu kripkai, hiriinan maigimairgar nwokripkaiyim. Mi ta yokwowa kara winkiya biya iikam kimiiram, kara kimiirin min boinkikin digworaekwowim maigimairga nwo karamae kara nwowiyim

simiir. Mi kara hiriyyar naingwowi, iya kara maingimairga mi owiyim mi wim kima iriipi hiriinan, ini maingimairgar mi owim. ⁴Mi iya kara yokwo kimiiram winin, kariir kwoinin miyyik miyyiknan bi nwokikin. Mi iya kara ta yokwowa kimiiram winkiya kara hindara nouu winkikin. Kara minsi naingwoyimyokikin, wari dimin biyeyim kimiir kwoinau waraur nwokaiyim kimiirin wi sim pi nipiyaokiiisi. Mi ta yokwowa kara kimiiram minam bi winboinkikin hik kimiir hauuam. Niingaka kara kimiiramin minsi winboinkikin kima kara naingwokwowiya kimiiram saiir ninokninkinim. Iriig.

Pol siya min boinkin om Korin hiran iikamim sima ti inkamin yipiki dimin biye tirin siir swoki ikunam.

⁵Mi inkamin yipiki dimin taemin biye tirin, siya wi kwoin whwokwoka nwowamin wi kariirara kipi nwo haiginu. Mi siya wi iikam hoingak kwoin whwokwoka nwowamin wi kimiir warar timi ohaiginu. Mi kara ti inkamin igao yai siir dimin biyeyim simiir wara boin tani. ⁶Mi dimin taeminim iikam kima tirim siir, ti dimin biyeyim siya tirim simiirsi, yim bidi digiyim. ⁷Mi tariinanin iikam kima wi siir dimin biyeyim siya tirim simiir simiira kipi naingwokwonanaei, yim bidi digiyim mi bidi haiyoprimdiyumiigiyim. Mi kima siirin yai miyyik imiirrar boinmimauu mi siirin sibgu siboboiniu haiginu mi ti dimin taemin hiriinanin yim wi siir kiyopsibgi haiginu rani, siir kwoinin biye siya nwowiguskiyamin niingaka. ⁸Mi hiriinankiniuwi mi kara kimiirin pi igao yai hiniina boinkii, kima siirin hiniina diisimauu, kima siiram naingwokwonanaei mi siirsi mi aingwoyimyoki. ⁹Kariir kwoin komiyyin hiniina naingwowi, kima kariir yai airam in a sibgu wakaeyoknam mi ta hiriinan sairsika kara ta yokwowa kimiiram asi winkikin. ¹⁰Iikam kima ti dimin taemin biyeyim ti inkam nwiruan siyasiyar tirim kimiir simiirsi kipi naingwo. Kima siir dimin biye imiir haiyoprimdiyumiigii mi an kara iriipi hiriinan wi siir dimin biye imiirar mi haiyoprimdiyumiigi. Mi ti dimin taemin bibiyeyim hiriyyar nwokripkaii mi mhoiyya simiirin kara haiyoprimdiyumiigii mi kara wi hiniina tiri, Kraisiir whwonkam idan, kara kimiirin wi wadieki wadieyar whinkinsiis haiginuwi. ¹¹Mi krima iikamim simiir dimin bibiyeyim simiir haiyoprimdiyumiigi. Krimiirin wi Setan siya pi nipiyaokiiisi mi wi siya pi mi iksisaeisi, ti inkamin yipikin krima nwowin io. Ihi, krima bidiyar yinokninkinim miyya Setan siya tiram naingwowa. Iriig.

Pol siya hikak Taitas siirsi nwokin siya om Troas hir nwo karamae nwowin

¹²Biiya kara nama biigi bii om Troasa hiriir, Kraisiir yai kibi kibi imiir boinmimauuam biyyin kimidiniya Biyyan Inkam Komii siyar

yamkwokin mi hirin siyar ini diriraerarkwokin simiir kwoin imiirin. Mi sima yayim yipiki kara boinmimauum simiiram asi naingwokim simiir wakaeyam. ¹³Mi kara naingwoyimiyok prasae bi kinkin. Dimusi rani, kara krimiir nomiiyauin Taitas siiram nwonanaekin. Mi siya bi nitkin kariir kigniyim. Mi kara iikamim yipiki hapairanim simiirin hiniin asi boingigin kima ha dwoki. Mi kara om Troas hir ha haiburgigin mi kimidiniya nu haimii Masedonia hiriir yam. Iriig.

**Aposel kam imiirin Adi Komii siya whinkinsiis
haiginiugin Setan siir nikwowaisiiyam.**

¹⁴Hindie wit, nimbi Adi Komii krimiir Wanin siir boin wadieki. Dimusi rani, krima ini Jisis Kraiss siir aowa ywowim mi ini saikar yamimasuwim mi krimiirin wi siyar whinkinsiis haiginiuwi kirie nwowamin. Ti nuan dimin biye biyeyim simiirsi. Adi Komii siya krimiirin minam nikiunakin Kraiss siir yai kibiya saiar boinmimauum hinda tinda. Mi ta yai kibiya ya ini piuii miyiknan ywowa omom omomim saeya bidi yinyokiigiya. ¹⁵Nim krima ini piuii miyiknan ywowim, iikamim yipiki Adi Komii siya nanmaiwarkainam simiirar ninyokiigi ti iikamim yipiki biye nwowim mi whaowaeki ikim. Mi hiriinan tiri krima mi krimiir miyim yim wi Adi Komii siir hirankar haiyskii. ¹⁶Mi ti iikamim yipiki whaowaeniskiyim yim wi paeni omin siirar nasae oyokiyokiikaeyami krima mi krimiir yai aeya ya ini piuii biyenan whaknan ywowa mi simiirin wi saeya tiri mi sima wa naokaonami. Mi yim ti iikam nhirim yipiki wi Adi Komii siya nanmaiwarkainaei, saika hiriirar nwoyokiyokiikaeyamam, krima mi krimiir yai ikim yim ini diminin sibgu whakiyin ini siir hiriinan ywowin. Mi simiirin wi siyar tirki, wadie sibgu owamin. Yipiki inkamkin ti hiriinan diminin siir sibgu tiri? Inkam nwirmin nwirmin karamaeyairga. Niingaka. ¹⁷Mi iikam whiekakim Adi Komii siir yai aiir boinmimauuwiyim sima simiir piu ara boinmimauuwi yim sima hinda umir haiyamar naingwowi mi ta miya krima miriia, nim krima hiriinan bi tirikim. Krimiir kwoinim yim wadiekim mi nim krima Kraiss siir yai kibi aiir boinmimauuwikim. Dimusi rani, krimiirin Adi Komii siya nimbingim mi krimiirin siya nikropkikin ta sairam. Mi krima mi Kraiss siya krima ini iripar yamasuim mi krimiir kwoinim ini kwoin whiruar ywowim. Mi Adi Komii siya ini krimiirar kigin, krima siir yai aiir boinmimauuim. Iriig.

Nim krima siyu winin siir miyan inkamkim

3 ¹Ti dimin taeminim krima winkiyim kimiiram simiir tir mi krimiir kwoinim wa nwoki aingwowim krima krimiir inig imiirar hainanaei mi kima wa nwoki aingwowim hiniin, nim krima wadiekim, aniya?

Mi wim kima hiriyar naingwowi, nim krima ini iki kam nhirim yipiki kimiir hauugiyim yokwo iki iikam nhirim om whiranim simiiram, ini simiir hiriinan ywowim kimiir boinkiyam hiniin, yim sima iikam wadiekin? Mi wim kima hiriyar mi aingwowi, nim krima ini hiriyar mi aingwowim kima yokwo krimiiram winkiyim mi iki iikam nhirim yim wa nwoki aingwowim nim krima inkam wadiekin, aniya? Niingaka. Krima yokwo kwir haiyim pi boriisopi. ²Mi wim kima ini ta yokwo hiriinana ini saiir hiriinan ywowim, ta krimiiram winkiya. Mi iikamim sima kigi mi sima wa ninokninkinki krimiir miyim mii wadiekin. Mi nim krima bidinanar ninokninkinkim hiniin, ta yaiya ya yaimwo aeyairga. ³Wim kima ini ta yokwo hiriinana ini saiir hiriinan ywowim. Wim kima ini yokwowa Jisis Kraiski si winkiya ini saiir hiriinan ywowim. Kariirin siya nimbingikin mi ta yokwowa siya hauugika. Mi an kara ha namin mi kimidiniya kimiir ini hauugig. Siya tidiyini bi winkikin. Niingaka. Siya Adi Komii siir naeyiun saika winkikin yipikin iinokiinokin omwai hiriyar waiyayokiyokiiyin. Siya siya bwaeyan siir idwo bi winkikin. Niingaka. Siya kimiir kwoinau winkikin.

⁴Mi ni krira pi hiniina boinkii, ni kririir miyo wadieko. Dimusi rani, krira hiriyar ninokninkini, kririirin Adi Komii krimiir Wanin siyar nimbingiko ti dimin taemin hiriinanin simiir tiram. Krais siya kririirin siir kirie aeyar whinkinsiis haiginiugin yipiki siir Ad ieya hauugiya Adi Komii siya siir. Mi krira hiriinan asi naingwowi, ta yaiya krira boinkiya kimiir, ya yai kaimwoki kaimwo aeyairga. ⁵Mi krira hiriyar naingwowi, ta miya kririir kirie ara priimiriigiswo, wi dig di ywowi mi krira wi hiniin di mi boini, krira wi digar nwowi. Dimusi rani, kririirin kirie Adi Komii siya hauugin mi krira mii aiir miriyim dig asi nwowi. ⁶Mi iya Adi Komii siya kririir nimbina iki iikam nhirim simiir boinmimauuwam, siyu winin siir yai kibi aiir boinmimauuwam, kririirin siya siyar whinkinsiis haiginiugin ta mii aiir miriyamin. Mi ti siyu winin siir yaiya ya yokwoni bi winka, ya Adi Komii siir naeyiun siya haigimauuga iikami kwoin. Mi ti siyu komii komiyim bidi bidiniya Adi Komii siyar hauugiyim, yim iinokiinokin iikamim simiir dimin biye imiir niisiimauuwankim. Mi sima simiir sibgu ap karamae nwowi, sima wi pi naowi. Mi Adi Komii siir naeyiun iinokiinokin iikam imiirin siyar nikpitmai haiginiuwi, sima sibgu oyokiyokiikaeyamim iinokiinokin Adi Komii saika.

⁷Mi ti siyu komiyin siir yayim Adi Komii siya winkiyim siya idwo mi kimidiniya Moses siir hauugi. Mi siya ti hiriinan tirkiyin mi Adi Komii siir kirieya ini paenan Moses siirar yuyakiya mi siir whwonkamin ini wara yuyakiyin. Mi mhoiyya ti diminin paenan niuyan ina prikiiraraokiyin mi mhoiyyan ini hindara kigugu iguskiyin. Mi ti diminin paenan niuyan Moses siir whwonkam hirin pranae pranae bi niuyakin mi

Isrel simiir iikamim sima siir bi sibgu kigsibwinkim. Ti dimin taeminim siyiu komii siirim, iikam imiirin simar naokao haiginiuwi, sima Adi Komii siir dimin miyik miyikim paenan niuyaiyim simaka nitkim. ⁸Mi nim krima iikam imiirin Adi Komii siir naeyiuin siir yai imiir boinmimauwi. Mi ti digworaekwowim krimiirin maigimaarga komiigak simar nwowaiiginiuwi mi krima mouni haniin asi siinkaowi yim ini Moses siya winim siyiu komii siir yayim biyanim ini simiir haiburim. ⁹Adi Komii siya ti siyiu komiiyin Moses siir hauugin. Yio iikamim simiir dimin biyie imiir niisimauugin mi simiirin hiriinan warar mi iisimauugin, sima wi iripa nwo rani, Adi Komii saikan, iinokiinokin. Mi ti siyiu komii siir miyim yim kaimwowaigim, bimbiuwi rani. Mi ti kitibmii boin wina sair miyim yim min nimbingim iikamim sima Adi Komii siir whwonkam ida dimin whirki kimbu karam nwowim. Mi hiriinanki niuwi mi ta miya ya ini siyiu komii siir mii air haibura kougi kouwin ini saeya ywowa. ¹⁰Moses siir miyim mi siyiu komii ikin, yo wadieki wadie owairgo. Mi ti dimin whiso, kirie aka mi siir dimin paenan niuyaei ikin yo bidi digiyo mi bidi mi prikiiyamo. Mi ini biyieki biyie ywokiyo. Mi Adi Komii siir naeyiuin siir miya ya tariinanin ini komiigi komii ywowa. Saeya ina miriya mi saeya wi prikiiyam tani. ¹¹Mi miya yipiki wi hiriyar nwoyokiyokiikaeyami ya dimin miyikin paenan niuyaeiyin siir kirie komiigaka. Mi miya yipiki wi ii priei nwo karamae nwowi ya wi sapi prikiiyami.

¹²Krma ta sairin ina ninokninkinim, tiki yai kibiyim yim wi hiriyar nwoyokiyokiikaeyami mi krma siir dimin miyikin paenan niuyaiyin siiram nwowi, siya nitim. Mi krma siir yaisim kwir swoki haigiprakai rani. Krma simiirin wa boinmimauwi mi iikamim sima wi nwoki inokninkinim simiirin. ¹³Krma Moses siya tirim simiir tir tani. Dimusi rani, yio siya bidi yinokninkinin siyiu komii siir kirie airin saeya digii. Mi siya siir whwonkam iirin yuisni asi nitimwaniugin. Mi Isrel simiir iikamim sima Adi Komii siir dimin kibiyin paenan niuyan siir whwonkam iir niuyan siya prikiraraoki mi ha digiguskii, wi sima pi kigisi. ¹⁴Mi ti Moses siya higriniuin siir whwonkamim yuisni mi Isrel simiir iikamim sima hiniina bi ninokninkinkim, Adi Komii siya simiir kwoin imiirin wi wadieyar nwowi. Tariigina ya ini yuisnan ywowa simiir kwoin iir higriniuam. Mi tariinanin Isrel simiir iikamim sima iripa haingiriyu owi mi sima Moses siir yayim simiir mwaini mi simiir kwoinim wi sibgu naingwo omok rani, Krai siir dimin taemin imiiramim sima tira sair hiriinan. Yi ini yuisnan ywowa ini simiir kwoin imiirar niki higriniukripkaiyim. Mi iya iikamim Krai siir yai air wakaeyim mi sima ha naingwo tibmiyim simiiram, yim ini yuisim yipiki simiir kwoin imiir niki higriniuim mi simiirin Adi Komii siya swoki haiyim ini simiir hiriinan ywowim. Mi siya simiir ina kabitnouwidnankaigiyim.

¹⁵Mi biiya hirankar nityokiyokiiyin mi ini tariinanar yadigniyin. Mi iiya iikam sima Moses siir yai imiir mwainiyim diminin yuisnanin simiir kwoin iir higriniuun. Dimusi rani, sima Krai siir dimin taemin imiir bi ninokninkinkim. ¹⁶Mi iikamim simiir mhii kwoinim kisina haigii mi sima Biiyan Inkam Komii Krai siiram naingwo tibmii kiini, yim ini ti iikamim Adi Komii siya kibwaembwae haigiyim yuisim yipiki simiir niki higriniuim ninokninkin karamae sima nwowam mi simiirin wi siya nitkaigaigi. Mi sima wa nwoki inokninkinim, ti dimin taeminim sima tirim simiir hiriinan. Tiriiginin yio ini Mosesni niki tirin ini hiriinan ywowin. Mi iiya siya Adi Komii siir omaka saiir namiyim mi ta yuisa siir mwo hir nwowa yapa hakaigingigi. ¹⁷Mi ti Biiyan Inkam Komii siir yaiya ya Adi Komii siir naeyiu ieyairgin. Mi iiya siya iikamim simiir kwoinaw nwokaiiyin mi siya iikamim yipiki Moses siir siyiu komiiyin mi dimin biyie aka sowiir aowa sima nwowa wi siyar nonkwo iuguskii mi sima wi rirmiya nwoki. Mi Adi Komii siya simiirin wi hiriinansi boini hiniinin, sima dimin whirki bi kimbugim. ¹⁸Krima whiekakar in ini opnainan ywowim, aknainan Biiyan Inkam Komii siir dimin kibiyin paenau niuyaiyin iki iikamim paenan simiir niuya haiginiuwikin. Mi krimiir whwonkam in higriniu karamae nwowi mi sima wa kigninokninkini Biiyan Inkam Komii siir naeyiu in krimakar nwowin. Mi krimiir kwoinim siyar kisisana haigiyokiyokiii siir hiriinan kinar nwowim. Iriig.

Aposel kamim sima paenan niuyan boinmimauugim

4 ¹Adi Komii krimiir Wanin sasaingin krimiirsi naingwoyimyokin mi krimiirin siyar mi imbingin siir mii aiir miriyyim siir siyiu komii winin iikamim simiir boinmimauuwim. Mi hiriinanki niuwi mi krima wi digiumii siir kipi haimriiyiu mi wi ta miya saiir miriisi kipi nidid. ²Krimiir digiuin ti mii bibiyeyim simiirin digiumii bidi haimriiyugigin. Mi ti iikamim yipiki inokninkin ti mii imiirin hindara nimprio miriyyim, yim wi simiirar swoki kiyopsibgi haiginiuwikim. Mi nim krima niksise mii bi miriigim mi krima Adi Komii siir yai aiir bi mi ikwowsaiigim mi saiirin yaeya bi mi kisina boinmimauuwikim. Niingaka. Krima yaimwokiyaaimwo aiirar boinmimauuwikim Adi Komii siir whwonkam idan. Mi iikamim ta yai aiir wakaeyim mi simiir kwoinim inokninkin pa ninokninkinkii, krima yaimwo aiirar boinmimauuwi. ³Mi ti mii kibi kibiyim yipiki krima boinmimauuwiyim iikamim simiir, sima sibgu wakaeyokna karamae nwowi mi yim ti sima omin paeya namiyin siir namanim mi sima wi sibgu inokninkin tani. ⁴Yim sima ta yai kibieya saiiram bi naingwo tibmii kiinikim. Dimusi rani, yiu biyeyin ti nuin siir tiranin Setan nikiuwiyin simiir kwoinim siya nitkii ikouwi mi sima ti dimin taemin imiirin paninsi sibgu inokninkinsi mi simiiram paninsi mi aingwo tibmii kiinsi. Simiir

kwoinim Setan siya kiyipsibgi haiginiuwi mi sima ti dimin iirin paniinsi sibgu inokninkinsi mi simiiram paniinsi mi aingwo tibmiisi simiir kwoinim siya kiyipsimsibgi mi sima paniinsi sibgu inokninkinsi Kraisi siir Yai Win kibieya saiirin. Ti yai kibi kibiyim yim Kraisi siir dimin taemin kibi kibiyim simiir boinka, yipiki krimiir niisiimauuwim hiniin, Adi Komii siya paniingin mi yipikin Adi Komiinan siyar swoki owin. ⁵Krira kimiirin, krira krirar bi priinaingwo boinkin mi kima wi kririir inig iirin wa hainan tani ningaka. Krira iinokiinokin kimiir boinmimauuwiyim krira hiriyar boinikim Jisis Kraisi siya Biyan Inkam Komiigin. Mi nikrira kimiir miyan inkamko krira kimiir whinkinsiis haiginiuwikim siir sibgu inokninkinim. ⁶Adi Komii siya biigi biiyarin ti hiniina boinkikin, niya diminin paenanin wa mi uyaei. Mi ya ta yaiya krimiir kwoinawu bidi kwirii idwokaiya. Krira Adi Komii siir kirieya saiir bidi kigim paeni haniin Jisis Kraisi siir whwonkam iir niuya. Mi ta kirieya, ta krira ninokninkina ya ini paeni haniin krimiirar niuya.

⁷Ya ini wadieki wadie ywowa, ini diminin nibnawu krira haigiyyin umir komii sainiyin. Krira nonkwowam mi krira haiyapririram mi ta Yai Win Kibiya Jisis Kraisi siira ya ini hiriinan ywowa mi nim krira ini ti nibim ini simiir hiriinan ywowim iikam ningam. Mi ti diminin siya haigiyyin krimiir kwoinawu, yio iikamim simiir niisiimauugim, dimin kibiyim krira tirim simiir. Yim ti dimin hiriinanim simiir bwamim yim krimiir tir nwo rani. Ningaka. Taki kirieya Adi Komii siir hiranki nitka, krimiir whinkinsiis haiginiuwam mi taka kirieya ini kirie nhirim simiir haiburim. ⁸Mi hinda tinda dimin bibiyeyim pa niti krimiir hauuwam kimpipisu mi sima krimiir bi nikwowaisiigim. Krira ninokninkin tani, ti dimin hiriinanim sima dimuam niti, krimiir hauuwamin kimpipisu mi krira ti dimin taeminim krira tirim simiir bi nonkwo iguskikim. Ningaka. ⁹Iikam whiekakim krimiir sau omom nwowim mi yio Adi Komii siya krimiir bi swoki haibur miminkin. Iikam nhirim krimiir bidiyar mi ipimpar akaigai aowim mi krira bi naokim. Ningaka. ¹⁰Mi iinokiinokin krimiir piuim hankak simiir simiirar nwoninaei biya kam bibiyeyim sima nipimpara Jisisni mi siir piu hankak hankak ha nwowaiginiuwa saiir hiriinan. Mi iya iikam sima ti hanim kariir piu tir nwowim simiir kigim mi sima ina yinokninkinkiyim, Jisis Kraisi siya ini krimakar nwowin mi krimiirin siyar whinkinsiis haiginiuwi mi iya inkamki krimiir nipimpariyim mi krira paniinsi yaosi, krira pi hiriinanar mi owi. ¹¹Mi ta iya krira ti nu iirar niki owa, iikamim sima krimiiramar kaokim, krimiir nisomsom aowam. Dimusi rani, krira Jisis Kraisi siir mi aiir mriigin. Mi ti dimin bibiyeyim krimiiram nitiyim mi ta hiriinan saiirsika ti iikamim sima pa ninokninkinkii, Jisis Kraisi siya ini krimakar nwowin mi krimiirin siyar whinkinsiis haiginiuwi mi krira hiriinan asi nwowi. ¹²Mi inkamim krimiir nipimpariyim mi krira pariipari wa pi yaowin. Mi ti dimin taeminim ti krira tirim, kimiir whinkinsiis

haiginiuwim mi kima wi Adi Komii saika nwoyokiyokiigaeyami, iinokiinokin mi kima wi ta yaiya wi saiiramar naingwo tibmii kripkaii.

¹³Mi bidi bidiniyarin inkam nwirin Adi Komii siir yai imiir winkiyin yokwo Samni, siya hiniina winboinkikin, kara Adi Komii siiram naingwo tibmii kiingin mi kara iinokiinokin siirin iki iikam nhirim simiir boinmimauuwikin. Mi hiriinanki niuwi mi tari ti inkamin hiriinan boinkikin. Dimusi rani, kima Adi Komii siiram siir hiriinan naingwo tibmii kiini. Mi krime iriipi hiriinan iinokiinokin iikam imiirin Adi Komii siirar mi boinmimauuwikim. ¹⁴Krime ti dimin taeminim iki iikam nhirim simiir boinmimauuwikim. Dimusi rani, krime hiriyar ninokninkini, Adi Komiiyin yipikin Biiyan Inkam Komiiyin Jisis siir hidninsiin idwown mi mhoyiya siya wi krimiir mi hidninsiin idwowi. Mi krime wi Jisis saikar nwowi mi krimiirin wi siyar nanmaiwarkinaei mi krime wi siir whwonkam ida kingiin namwoiwi. ¹⁵Mi dimin bibiyeyim, aposel kamim krimiir nimbimbiniyim, yim tiriiginim yim kimiir whinkinsiis haiginiugim. Dimusi rani, krimiir yai imiirsika. Mi Adi Komii siir naingwobumbu ini hinda tinda yamkiya. Mi iikamim ta saiiram naingwo tibmii kiini mi sima Adi Komii siir boin wadiekii mi wi siir inig iir hainan prapraskii, ti dimin taeminim siya tirim simiirsi. Iriig.

Yim ti digworaekwowim yim dimin komii rani.

Dimusi rani, krime wi mhoyiya haii.

¹⁶Krime wi maigimaigra nwo karam nwo rani, ti dimin taeminim Adi Komii siya iikam krimiir hidninsiin idwowi mi krime whiekakarim wi siir inig iir hainan prapraskii. Mi iinokiinokin krimiir piuim yim wa naonami mi iinokiinokin Adi Komii siya wi krimiir kwoin iirar whinkinsiis haiginiuwi wadie nwowamin. ¹⁷Mi ti dimin taeminim ti hik krimiir hauu haiginiuwim yim dimin komii rani, yim ii priei bi nwowikim. Mi krimiirin wi sima whinkinsiis haiginiuwi, Adi Komii siir dimin miyik miyikim yipiki hiriyar nwoyokiyokiikaeyamiyim iinokiinok simiir haiyamin ini iki digworaekwo nhirim simiir haiburim. ¹⁸Mi hiriinanki niuwi, krime krimiir kwoin komiiyin wi ti dimin taeminim krimiir nhwokar kigiyim wi simiiram kipi naingwo. Niingaka. Krime dimin taeminim krime kig karam nwowiyim, Adi Komii siya hauuwi krimiir mhoyiya, simiiram daingwo mi simiiram dwokwokin. Mi ti dimin taeminim ti krime kigiyim, tariinan, yim wa niti mi wa swoki digi mi dimin taeminim yipiki krime kig karamae nwowiyim yim wi hiriyar nwoyokiyokiikaeyami iinokiinokin. Iriig.

Dimin taeminim aposel kamim sima tirim yim

iikam imiir whinkinsiis haiginiugim

5 ¹Krime hiriyar ninokninkini, mhoyiya ta krimiir nuan piu biyeya ya wi sapi naowi mi wipi whii mi ya wa namkii. Yim ini omakam

hindara nini kaigriniu whwonkai sasaeiyim ini simiir hiriinan ywowim. Mi iiya krma naowi, krma ina ninokninkinim, krimiir piu kibiya yipiki wi hiriyyar nwoyokiyokiikaeyami, saiirin wi Adi Komii siyar swoki hidninsiin idwowi mi krma wi hiriyyar nwoyokiyokii kaeyami siir om hirin. Yim ti digworaekwowim yim ini omaka miyika Adi Komii krimiir Wanin siya mirii okwowa siir om hir krimiiram, krma nwowam ini saiir hiriinan ywowa. ²Mi tariinanin krimiir kwoin komiyyin ini wari omin kouwanin siir waraur nitamar naingwowin, ti piu win kibiyim yipiki wi Adi Komii siya hauwi krimiir mi krma wi simiirar nini onii. ³Mi hiriinankiniuwi tiriiginin hiriinan tirkiswo mi krma wi kwoinbudara di ywowi mi hiriirin piu karamae di yapninopkai nami. Niingaka. ⁴Krimiir kwoin komiyyin ini ti piu winim yipiki wi krma haii Adi Komii siir hiranki, ini simiir haiyamar hiugimkripim. Mi ta piu biyieya ta hindara nwoyosaeiya, ta krma nwowa ti nu iir ya iinokiinokin hik krimiir swoki hauunanaei. Mi krma pi boriisopi ta pua kwoinbudara nwowiya saiir nwowim krma hiniinam naingwowi, Adi Komii siya piu win kibiya saiir nii kinirkai haiginiuwim. Mi krma ta pua naonanaeiya ta pua nao karamae nwowiya saika ninowanam tiri.

⁵Yio Adi Komii sasairgin yipiki ti piu win imiir diriraerarim krimiiram, krma haiyam. Mi ta hiriinan saiirsika. Dimusi rani, ti dimin iirsika. Siya siir naeyiutin krimiir bidi hauugiyin mi krma wa nwoki sibgu inokninkinim hiniin, krma ti dimin taemin imiirin wa haii ti siya nimbiniim krimiiram.

⁶Mi ti hiriinan saiirsika krma ina ninokninkinim, ti dimin taeminim Adi Komii siya diriraerarim, siya wi krimiir hauwi mi iinokiinokin krma wi kirie hiriyyar nwokripkaii iripa nongwomamaier aeyam. Krma ina ninokninkinim, ta iiya krma ta piu airar niki owim, krma Adi Komii saika niki orani, siir om iir. ⁷Krma ti diminim Adi Komii siya diriraerarim krimiiram krma simiir niki kig rani. Mi nim krma bidiyar yinokninkinim krma simiirin wa haii. Dimusi rani, Adi Komii siya bi niksisaekin siya yaimwo ara boinikin. ⁸Kara kimiirin kaimwowar boinkii, krma naosi naingwo idid rani. Niingaka. Krma ta nu tiran pua saiir haiburgigam tiri. Mi krma wi Biyyan Inkam Komiyyin Adi Komii wi saika niki owim siir om hir. Yio tiriiginin ini ti krimiir piu aeya nwowa ti nu iir ini siir haiburin. ⁹Mi ta pua ta nu iir krimar mi owa krma saiirar mi owi mi krma krimiir piu kibiya Adi Komii siir omana saiirar mi owi, ya ti hiriinana ya dimin komii rani. Krma biyyin minam tiki aingwo, diminin Adi Komii siya naingwowim krma naingwo tibmii kiinam mi krma tiram, simiir tiram daingwo. ¹⁰Kara tiriiginim kimiiram boinkikim. Dimusi rani, mhoiyya krma wi Kraisiir whwonkam ida nokwowi mi wi siyar hidi krimiirin, dimin taeminim krma tirim simiirsiiyin. Iiya krma ti piuim ti nu iiranim simiirar niki okripkai mi siya wi krimar tirim wi simiirar swoki hidi. Siya dimin wadie nasi tiri, iyie? Wi dimin biyie tiri krimiirin, krma tirim simiirsiiyin. Iriig.

**Aposel kamim sima iikam imiirin minsi whinkinsiis
haiginiugin sima Adi Komii saika nongwomamair aeyim**

¹¹ Mi iya krīma Adi Komii siirsi nidida sair ninokninkinim krīma miini haniin asi miriigim simiir kwoin imiir kiyaiyam mi sima simiir nwoki wakaeyoknam. Dimusi rani, krīma ina ninokninkinim, mhohiia siya krīmiirin wi dimin taeminim krīma tirim wi simiirsi hidi. Adi Komii siya krīmiir kwoin imiirin ina ninokninkinin. Mi an kara ha naingwowi, iikam kimiir kwoinim hiniina daingwo, an kara siyu miyik iirar napikin. Mi ti dimin taemin hiriinanim simiirin kara whinkinsiis haiginiugin, ta Adi Komii siya mi aingwowa sair hiriinan. ¹² Krīma krīmiirin hiniina tir tani, kima hiniina swoki boinam, krīma wadiekim, krīma ti dimin taeminim kimiir boinmauwamin minam naingwokim, kima wa nwoki inokninkinim, krīmiir siyu paniingin. Mi mhohiia kima iikam imiir boini, yipiki ti ha naingwowim, inig komiigak nwowiyim mi yuis miyik miyik ikim ini kou sima ywowim. Mi inkami kwoinim yim ini paniina nwowim mi kima simiirin wi ha boini tiriiginim yim miyik rani, ini kipiii ywowim. ¹³ Mi kima krīmiir boini, sima ti hiniin asi boini sima pi whaowaei. Mi nim krīma krīmiirin wi hiniina boini, tariigina ya Adi Komii siir mii aeya ti hiriinan krīma boina. Mi kima krīmiir boini, simiir kwoinim wadiekim, sima ti hiriinan boinim mi krīma krīmiir boinmauwui, yi wi minsi boinmauwui, krīmiirin wi saeya nwoki whinkinsiis haiginiuwim. ¹⁴ Mi ta Krai siya iikam krīmiirsi naingwokwonanaeiyā mi krīmiir kwoin imiirin saeyar kiyai mi krīma ta mii aiir asi mirii iikam kimiir whinkinsiis haiginiuam, ti dimin taeminim simiir kirieni. Krīma ti hiriinan dimin taemin imiir asi tirkim. Dimusi rani, krīma bidi yinokninkinim siya siyairgin naowin. Mi krīma naoni haniinaka ini siyar yaowiskiyin krīmiirsiyā. Ya tariigina ya hiniinga krīma whiekakarīn saika bidiyar yinkin aonamim. ¹⁵ Krīma naoni haniinaka ini siyar yaowiskiyin krīmiirsiyā mi nim krīma iikamim yipiki ti nu iir nwowim, krīma dimin taeminim wi krīmiir kwoinairga priinaingwo diriraerar tani. Niingaka. Krīma ti inkam nwiruwān yipikin biiyar naowin, yipikin Adi Komii siya hidninsiin idwowin mi omwai ha swoki waiyan iikam krīmiir whinkinsiis haiginiuwam siir kwoin iirarar dap iski.

¹⁶ Mi hiriinankiniuwui mi krīma wi hiniina di yaingwowi, iikamim sima wadiekim, iyie? Biyiekim. Dimusi rani, sima inig komiigak bidi ywowim, iyie? Dimusi rani, sima digworaekwoki naokingugunankaigim. Niingaka. Yim ti hiniin digworaekwowim yim nu tirankim. Biya iikam krīma dimin bibiyeyar niki tira, krīma Jis Krai siirin inkami siyu iirarar hidgin. Mi Tariinanin krīma iikam imiirin wi hiniina hid rani, wadie mi biyie. Niingaka. ¹⁷ Mi iya iikamim sima naingwo tibmii kiini Krai siir

yai imiiram mi Krai Jisis saika sibgu amasu kikini mi siya simiirin wi iikam win nwo haiginiugi mi wi dimin whirki kimbu rani. Mi ti biiyan dimin wrowim yim wa digii. Mi dimin taemin winim yim biiyan dimin taeminim wi simiir igsoop aiir nokwokairinanaowidi.

¹⁸ Mi ti dimin taeminim krimiir tirii nimbiniyim iikam win krima nwowam, yim wi Adi Komii sasar tir iski simiirin. Krai siya paeyin hiiniya nironinkinin siirin ti hiriinan saiirsi naokin, ti dimin taeminim Krai siya tirim krimiir mi Adi Komii siya ti dimin taeminim Krai siya tirim krimiir, hiriinan saiirsi tirkin, krimiirin siya whinkinsiis haiginiugin mi iikam krima yipiki biiya Adi Komii siir sau omom niki owim, tariinanin krima ini nomiyau saikar swoki owim. Dimusi rani, Jisis siyar ninkiamasugin krimiirin. ¹⁹ Mi dimin taeminim krima boiniyim kimiir yim ti sima, Adi Komii siya iikamim nuanim krimiirin, dimin taeminim Krai siya tirin simiirsi ninki amasu haiginiugin. Mi tariinanin Adi Komii siya krimiirin bidi yimbinim nomiyau nwowam. Siya dimin bibiyeyim krima tirim simiirsi naingwo rani, simiirin siya bidi haiyoprimdiyumuigiyim mi tariinanin siir miyiyim ini aposel kam krimiir kwauuwa. Siya iikamim nuanim krimiiram naingwokwonanaeikin mi krimiir ina yinkiamasuin krima saika nongwomamair aeyim.

²⁰ Krimiirin Adi Komii siya bidi yimbinim mi krima Krai siir igsoop aiir asi nokwokairinanaowigim. Mi ti dimin taeminim ti krima boinmimauuwim kimiir, yim Adi Komii siya boinmimauuni haniinaka tisi krimar boinmimauuwim kimiirin. Krima Krai siir whinkinsiiskin mi krima kimiirin hiniin asi boini, kima Adi Komii siiram kiwaki, kimiir whinkinsiis haiginiuwam mi kima wi saika nwoki ongwomamair aekiyamim mi wi saika niki sibgu owim. ²¹ Krai siir kwoinin sasaargin dimin biyie whirki nwo karamae nwowin. Mi krimiirin Adi Komii siyar whinkinsiis haiginiugin mi krimiir dimin bibiyeyim krima tirim, yim ini siyar haipriginkiyim. Mi simiirin ini Krai siir inarar yonkwokiyim mi krima naoni haniinaka ini siyar yaoiskiyin, krimiir dimin bibiyeyim simiirsiyin mi krima wi saika asi namasukikini. Siya ti hiriinanin minam tirkin, iikamim krima yipiki siir yai aiiram naingwo tibmii kinim, Adi Komii siya krimiirin wi ha boini, krima dimin whirki bi kimbugim siir hiriinan. Iriig.

**Aposel kamim yipiki Adi Komii siir yai aiir boinmimauuwim
sima dimin bibiyeyim simiirsiyin hik prasae bi haigim**

6 ¹ Mi ni krira, Pol kara mi Timoti siya, ni krira iripa Adi Komii krimiir Wanin saikar miriigo. Mi krira kimiir asi niki, kima Adi Komii siir naingwobumbu aiir bidi haiyim mi ti naeyiun siirin hinda whisariiyar priiyokaeyamam kipi tir. ² Ihi, kima wi hiriinan kipi tir. Adi

Komii siir yayim kamim sima winkiyim bidi bidiniyar Yokwo Komii sair, yim hiniina winboinkikim,

mi Adi Komii kara, kiriir whinkinsiis haiginiuwam naingwowi kira nhwo kwisboini mi kara ta kira kwisboina sair wakaei mi ti diminim kira kwisboinkiyim kara simiirin wa whinkinsiis haiginiuwi. Mi iya kara kimiir nimbini mi iikamim ti nu iir nwowim kimiirin wi kara nanmaiwarkainaei mi kimiirin wi kara whinkinsiis haiginiuwi.

Ti kara boinanin kimiir simiir wakae, tariinanarin Adi Komii siya kimiir hainan prapasam naingwowi. Mi tariigitariinanarin, siya wi kimiir whinkinsiis haiginiuwi mi wi kimiir nanmaiwarkainaei. Mi hiriinanki niuwi mi ti naeyiun whisariiyar kipi priiyokaeyam mi ta naingwobumbuwa wi kigugugisi.

³ Mi nim krma inkamim pi boriisopi iikam nhirim sima ha naingwowim ti dimin taeminim krma tiriym miyik rani. Mi nim krma dimin biye whir bi swoki tirmintirminkim, simiir kwoin imiir kiyaiyam biye sima nwowam mi sima krimiirin wi ha boini tani krimiir miyim biyekim. Niingaka. Mi krma dimin biye tirkiswo mi tiriiginin simiirin wi siya pi kiyopsbgi haiginiuwun mi sima wi di yokworinuwi. Mi ni krira hiriinan naingwo rani, sima kririirin hiriinan naingwo rani. Niingaka. ⁴ Mi ti diminim krma tirim simiir tirni haniinaka, krma iikam imiir niisiimauuwikim hiniin, krma Adi Komii siir miyan inkamkim. Krma iikam imiirin hiniina niisiimauuwikim krma hiriyar nokworinukripkaiigim dimin taemin biye biyeyim krimiiram nitiyim mi hikpai hikpaiyim krimiir hauuwiyim krimiir tirbuwam, krma simiirsi bi hiuniyanaikim. ⁵ Sima krimiirin bidiyar mi ipimparim mi maeyaua mii biye miriia sair hir bidiyar mi hugripkiikikaiyim. Mi krimiir sau omomim sima krimiirin siyu miyiknan bi tirkim sima krimiirin ha mi igbumbu. Mi krma mii pranaepranae bi miriigim, ini piu whaowaki krimar ywobugiyim. Hi nhirim krma nhwo bi sibgu whwonkaiigim mi mipi nae karamkamar mi ami. Dimusi rani, krma Adi Komii siir yai aiir boinmimauugim mi sima krimiirin hiriinansi tiri. ⁶ Krma krmaigim siyu miyik sibgu tiriym mi nim krma Adi Komii siir dimin taeminim ina ninokninkinim. Mi nim krma io bi nanka osisauuwikim, dimin taeminim krimiir kou nwowiyim simiirsiyin. Krma bigin nasmirwaiya nwowikim mi krma iikamim simiirin maigimaigpa pa mi iisiimauuwi simiir whinkinsiis haiginiuwam mi simiiram naingwokwowam. Mi ti Adi Komii siir naeyiun, ti krimiir kwoinawu nwokaiyin, krma iikam nhirim simiirin hiniina niisiimauuwi, krma Adi Komii siir miigi mii aiirar mirii. ⁷ Krma iinokinokin yaimwo aiirarar nowomwarkaiyuwikim. Mi Adi Komii siir kirieya yipika krimiir hauugiya, iinokinokin krimiirin saeyar whinkinsiis haiginiuwi, krimiir miyim. Ti kamim yipiki yaiini digworaekwo nonkwowiyim, sima

kimirkaiyam, ti dimin hiniinim nhaosau, irim hipig, simiir sau omomin saika ninitam, ini simiir hiriinan ywowim, ti siyiu miyikin krima nwowiyin mi miyim krima miriyim yim ini hiriinan ywowim. Yim sima inokinokin krimiir kimirkaiigim, tiriginim yipiki yai biyie krimiir boiniyim mi dimin biyie krimiir tiriyim yim sima wi krimiir nikwowaisii rani. Niingaka. Simiirin wi krima nikwowaisii. ⁸Iikam nhirim yim krimiir inig imiir hainani mi nhirim yim krimiir swoki ikwowaisii nhirim pi krimiir mi igbumbu kauwok itkin boini mi nhirim iikam nhirim simakan krimiirin pi yai wadiyar mi boini mi krimiir siyiu ikin. Mi yim ti hiriinan dimin taeminim yim dimin komii rani. Mi krima ti dimin taeminim krima tirim simiirin wi hiriinanar tirikrikai. Mi iikam nhirim yim ha naingwowi, krima iikam paii rani, niksisaeyaka waiwiigim. Mi krima hiriinan bi tirikim krima yaimwo arar boinimauuwikim. ⁹Mi ti iikam hiriinanim yipiki Adi Komii siir ninokninkin karamae nwowiyim mi yim sima iripi hiriinan krimiir mi inokninkin tani. Mi Adi Komii siya mi siir iikam ima, yim sima krimiirin bidiyar yinokninkinim. Iikamim krimiirin ha naingwowyim, krima wi krimbi naowi mi krima pi omwaiya swoki waiyai. Adi Komii siya kam imiirin minam kiwakikin, krimiir tioim. Mi siya ini krimiirar kigirkakin mi krima paniinsi yaosi. ¹⁰Mi ti dimin bibiyeyim krimiiram nitiyim, krimiir kwoin imiir kiyaiyam, krimiirin wi sima tiri, maigimaigra nwo karamin. Mi inokinokin krima wi maigimaigra hiriirar nwokrikaii. Krima paeprikabar mi oka windi, dimin taemin mi tir karamae, krima iikam imiirin wa whinkinsis haiginiukrikaii Adi Komii siir dimin taeminim simiir sibgu onkworinukrikaiyim. Nim krima ini inkamim ti nuin siirin digworaekwo karamae nwowiyin ini simiir hiriinan ywowim. Mi nim krima digworaekwo miyik miyikakairgim mi ti digworaekwo miyik miyikim inkamki simiir nispakii haiyim wi dig nwo rani.

¹¹Mi kima ti iikamim ti omin Korin siir hiranim, krira kimaka bidi boino mi dimin taeminim kririir kwoinawu tir nwokaiyim kimiir bidi boinimauuwim. Dimusi rani, krira kimiiram nhami nhami naingwokwonanae rani. ¹²Kririir kwoinin kimiiram naingwokwonanaeyin bi niki digikin. Niingaka. Krira kimiiram nhami nhami naingwokwonanae rani. Mi kimiir kwoinim kririiram naingwown yio bidi digiyin. Mi kima kririiram naingwokwonanae rani. Niingaka. ¹³Mi tapa kara kimiirin pi adin siir yinisim iir boiniyim pi siir hiriinan boinkii. Mi kara kimiirin pi hiniina boinkii, kima kririiram daingwokwonanae ta krira mi aingwokwonanaeya iikam kimiiram saiir hiriinan. friig.

**Krima Adi Komii siir iikamim krima iikam
biyie biyeyim simaka kipi namasu**

¹⁴Kima ti iikamim yipiki Jisis Kraiis siiram naingwo tibmii kiin karamae nwowim iripa simaka kipi namasu. Nii nabieyo yo iripa bi

nwowiko mi ti hiriinan siyu kaimwowin, Adi Komii siir iikamim sima iki iikamim yipiki Adi Komii siiram naingwo tibmii kiin karamae nwowiyim simaka kipi mirii mi diminin sima mi tiriyin siir wara kipi mi tir. Niingaka. Dimin taeminim yipiki wadie nwowiyim mi dimin taeminim yipiki biyie nwowiyim yim iripa kipi nwo. Niingaka. ¹⁵Mi kima hiriayar naingwowi, Kraisi siya mi Setan siya sowa wi kwoin whiruwar nwowi? Yi ti hiriinanin ini niinga ywowin! Mi inkamin yipiki Adi Komii siiram naingwo tibmii kiiniyin mi inkamin yipiki hiriinan kwoin naingwo karamae nwowiyin, sowa wi iripa paniina nwowi? Yi tiriiginin yio siyu rani! ¹⁶Mi Adi Komii siir omaka mi uruwai siyaowaini omaka aka, sowa wi iripa paniina nwowi, irua nwowamin? Yi siyu rani! Krimiiir piuim sima ini omakanan ywowim maeyaua Adi Komii siir naeyiu ieya nidwokaiyana krimiiir kwoinawu tirin. Mi Adi Komii siyarin biya yokwoni hiniina boinkikin,

kara wi kariir iikamim simiir mhii kwoinawu nwokaii kara wi simakar nwowi kara wi simiir Adi Komii nwowi mi sima wi kariir iikam nwowi.

¹⁷Mi Adi Komii siya ta hiriinan sairsi boinkin,

kima ti dimin biyie biyeyim, ti iikam bibiyeyim sima tiriyim, simiirsirin aru dwo mi kima simiirin digiumii haimriiyugig. Mi kima ti dimin taemin hiriinanin simiirin digiumii haimriiyugigi mi simiir mi ap karamae mi owi mi kimiirin wi kara haii, kariir iikam nwowam. ¹⁸Mi kima hiriinan tiri mi an kara wi kimiir Ad nwowi mi wim kima wi kariir yinisimki yinisim yinkamiyin mi yinisim yinugiyinar nwowiskii, Adi Komiiyin, yipiki ti nuan digworaekwowim simiir tirkiyin mi ninomor kouan ikim, siyairgin Biyan Inkam Komiiyin ti hiriinan boinkiyin. Iriig.

7 ¹Ti kariir nomiiyauim, yipiki kara naingwokwowyim, Adi Komii siya ta nimbina krimiiir hauugika. Mi hiriinankiniuwu, krima krimiiir digiun, ti dimin taeminim yipiki krimiiir tiriyim dimin biyie tiram mi ti dimin taeminim yipiki krimiiir kwoin imiir kipridiyim, simiirin digiumii haimriiyugig. Krima siyuun Adi Komii krimiiir Wanin siir whwonkam ida dimin whirki kimbu karamae nwowiyin siirarar dap iski mi Adi Komii siir kipi tir, siya krimiirsi nididim. Iriig.

**Om Korin hiran iikamim simiir mhii kwoinim kisina haigigiyim
mi Pol siir kwoinin ini maigimaigar ywokiyin.**

²Iikam kima, kririiram daingwokwonanaei krira kimiir warauran iikam nhirmi dimin biyie whir bi swoki tirbugo. Mi krira kimiir iikamim simiir inkam nwir bi swoki tirbumiminkin mi krira kimiir bi swoki iksisaekim mi kimiir nwirni diminsim whir bi swoki priihaigo, kimiir nhir ima boina sair hiriinan. Niingaka. ³Kara ti yayim kimiir

nikiyam bi boinkin. Niingaka. Kara biiya kimiirin bidiyar iki boinkiyin mi tariinanin tisa swoki boinkiyin, krira kimiiram pranae pranae naingwokwo rani, kima naowi, krira kimaka naowamar mi aingwowi, iyie? Wi hiniin kipi tir mi kima omwai mi waiyai mi ni krira hiriinan omwai kimakar mi waiya amar mi aingwowi. ⁴Kara kimaka kwoino whisa nwo rani kara iinokiinokin iikamim warauranim kimakan hinda maingimainga arar nwonanaeikin. Mi iya dimin taeminim kririiram nitiyim, kririir kimpipisu haiginiuam mi krira pi diminim iikam kima tiriyim pi simiirar naingwo kripkaii. Mi tiriiginim kririirin maingimainga sima nwowaiginiuwi mi kririir kwoinin hiinsima asi nwowi.

⁵Mi iya krima nu haimii Masedonia tiriirar mi ita, krima wadie bi mini onikim dimin bibiyeyim krimiirin ini hiriayar swoki tirkripkaiyim krimiir pua bi swoki siismiminka. Niingaka. Sima kririirin bidiyar mi ikwao boinim mi bidiya mi inkinyaeyao boinim mi kririir kwoinin iikam kimiirsiyin nidid prasae mi naingwoyimyok prasae bi kinko, dimin taeminim krira tirgigim kimiir mi inkam biyeyin siya niti, wi siya nini tirbuni simiirin. ⁶Mi Adi Komii siyairgin yipiki iinokiinokin iikam sibgu siiboboiniu haiginiuwiyin, iya sima hikak nwowiyim. Krimiir kwoinim siyar niki kinsiis haiginiugin inkamin Taitas nikiuwiyin siya nikropkiyin krimiir nini kigniyam. ⁷Hi, siya bidiyar yitin krimiirin siya ini siiboboiniu. Siya krimiirin min nini boinikin, kima siirin panin panina siiboboiniu gim dimin taemin kibi kibiyim kima napim mi kima tirim. Tiriiginin krimiirin maingimainga sima nwowaiginiuwi. Mi siya ha nitin, krimiirin siya ini boini, siya kimiir bidi kignakiyin mi wim kima krimiir kigam asi naingwokim. Mi kima ti dimin taeminim kima tirim simiirsi asi nididgim, yipiki hik krimiir tirhaiginiuim. Mi wim kima krimiiram asi naingwokikim mi wim kima pi krimiir mirmii aiar nwowi iya iikam ima boiniyim dimin taemin biyeyim krimakar ninkikiniyim kimiirsi. Mi kima ti hiriinan dimin taemin imiir tirkiyim mi wim kima kariir tirkii, kara maingimainga kimaka nwowim.

⁸Mi ta yokwowa biiya kara winkiya kimiirin hikak saeya mi o karamaeki windi mi an kara ha naingwowi, ta yokwowa biiya kara winkiya kimiiram ya dimin wadie aeyairga. Kara hikak dimusi bi nwokin, kara hiriayar naingwokin, kimiirin ii nhirim wi hik saeya hauwi. ⁹Mi tariinanin, kara maingimainga komiiga, kara yokwo kimiiram winkiyin kara maingimainga bi nwokin, kima ti hikak dimin taeminim kara winkiyim hikak simiirsi nwowim. Niingaka. Kara maingimainga minam nwokin hikak kima nwowa mi kimiir mhii kwoinim kisina haigiyim mi ti dimin miyikim simiiram swoki sibgu apim. Ti dimin taeminim kara winkiyim kimiiram, simiirin Adi Komii siya bidi haiyim. Krimiir kwoin imiir kisina haigiyam mi kimiirin sima whinkinsiis haiginiugim. Mi hiriinan sairsika krima maingimainga asi

nwokim. ¹⁰Ti dimin taeminim simiirin Adi Komii siya haigim mi kimiirin hikak asi nnowaiginiugim mi kimiir mhii kwoinim siya kisina haigikim. Mi siya wi kimiir asi whinkinsiis haiginiuwi mi kimiirin wi ti dimin taeminim simiirsi asi nanmaiwarkainaei. Ti diminim yim dimin wadie imairgim mi krima simiirsiyin maigimairga nwo karamae kipi nwo. Mi dimin taeminim yipiki nuan iikamim simiir tiriyim, maigimairga nwo karam sima nwowam, yim naokaowikim mi simiirin kwoinbudin omwai waiyayokiyokiyam sima bi whinkinsiis haiginiuwikim. Niingaka. ¹¹Sibgu sibgu daingwo omok ti hikim simiir tirim mi Adi Komii siya simiirin ha ninkpitkiyim kimiiram sima ini dimin wadieki wadie imar yimbiamim. Mi sima kimiir kwoin imiir asi tirkim hiriinan nwowam naingwowim. Mi simiirin digiumii haingikim, ti dimin bibiyeyim kima napim, yipiki kara winboinkiyim. Kimiir kwoinim sima kiprid haiginiuwi, inkamim yipikin dimin biye tirin siirin igao yai boinim. Mi kima ti dimin biye hiriinanim yipiki kimiir nimbiamim simiirsi bidiyar mi ididim. Mi kima hiriinan bidiyar mi aingwowim, kara niti kimiirin simiirsi whindiraeraram mi wim kima kimidiniya kamim dimin bibiyey tiriyim, simiir whinkinsiis haiginiuam swoki kwanaingwo. Ta yokwowa kimiir tirkika, kima kariiram naingwokwonanaeyim mi kariiram naingwowim, kimaka iripa nwowam mi ya tariigina ya kimiir whinkinsiis haiginiuga kimiir naingwo tibmiiya Adi Komii siiramim kirie nwowim. Kima kariir yai aiirin bidiyar wakaeyim mi ya tariigina, ya kariir niisimauuga hiniin, siyiuin kima nwowiyin hinda tindan wadie bidi ywokiyein. Mi dimin biyeyim kimiir waraur nwowim simiirin kima bidi sibgu tirkiyim mi siirin kima asi niridnatkikin.

¹²Mi iiya kara ta yokwowa saiir winkiya, kara kamim yipiki siyiu biye tirim simiirsi bi naingwokin. Mi iiya kara ta yokwo aiir winkiyin kimiiram kara ti inkamim yipikin siyiu biye tirin siirsi bi naingwokin. Adi Komii siya kariir kwoin iirin bidi yinokninkinkiyin, ta yokwowa kara winkiya iikam kimiiram, kimiir whinkinsiis haiginiuam kara hiniina naingwowi kimiir siyiuim idowiiya dwoki Adi Komii siir whwonkam ida. Kima wa nwoki sibgu inokninkinim, kima kririiram naingwokwonanaei mi ta hiriinana saiirsi winkika ta yokwowa. ¹³Mi dimin taeminim kima tirim kririir, kririir siiboboiniu haiginiuim sima sima rani, dimin taeminim kima whindiraerarim Taitas siir wokmaihaginiuam mi krira ti saika nwowo, krira maigimairga komiiga. ¹⁴Mi biya kara kimiir inig imiir boinmauu wakaeyin mi kara Taitas siirin ha boinkin kima wadiekim mi ti dimin taeminim kima tirim kariirin wi nididgak sima nnowaiginiu rani, ta kara boina siir. Mi ti dimin taeminim kara boinim iikam kimiirim hiniin sima wadiekim, yim ini ti yayim biya krira niki boinim kimiir whiekakar ini simiir hiriinan ywowim, yim kaimwowaigim. ¹⁵Biya Taitas siya kimiiram waraur niki

itin, kimiir kignakiyın mi kima siirin wadie ha sibgu ohaiginiugiyım mi siirin ha mi sibgu kigriraowım mi kima dimin taeminim siya boinim simiirin ha mi wakaeyokna. Mi siya ta saair naingwokiyın siya kimiiramın pranae pranae bi naingwokwokin, ini biya siya naingwokwowa ini saair haiburin. ¹⁶ Mi tariinanin, kara ha naingwowi, kima mi kara, krıma ini kwoin whıruar ywowskiyım mi kara kimiiramın kwoin whısair bi nwokikin kara maırgımaırga komiıga. Iriig.

**Adi Komii siir piugana saair iikamım sima irni
nwirni dinan whinkinsiis ankinsiis**

8 ¹ Ti kariir nomiiyaım, krıma yai kimiir boinmauwam naingwowi mi kima pa nwoki inokninkinim, dimin miıyık miıyıkım Adi Komii krimiir Wanin siya tirim siir piugana saair iikamım simiir, nu Masedonia hiran isidin siir. ² Mi iya simiirin iikam nhirkim tiriyım dimin biyie, sima pi maırgımaırga hiriıyar nwokripkaii. Mi sima iikam paeprikabar mi oka windi, sima pa mi maırgımaırgaei. Dimusi rani, sima bidi yinokninkinim, simiir dimin bibiyeyım simiirin Adi Komii siya bidi haiyoprimdiyumiıgiyım mi sima simiir umirim irıpa asi haıngiriyıu hauugii iki iikam nhirim simiir. ³ Kara kimiirin kaimwovar boınkii, sima umirim simiir kwoınkar naingwo hauuwi simiirin. Mi sima umir hoımgak karamaeka windi sima Adi Komii siirin pa mi hauuwi. Mi kara simiiram bi boınkın, sima hiriinan tirim. ⁴ Simiir kwoınim Adi Komii siir iikamım om komii Jerusalem hiranım simiiram naingwokwonanaei simiir whinkinsiisam. Mi sima krimiiram asi nımpiwırwirkripkaiıgım ti umirim simiir hainamım hiriir. ⁵ Sıma iıwa rigar hauugım. Sıma wadieyar tirkim, sima ta krıma naingwowa simiir, sima tiram saair hiriinan bi tirkim. Bii simiir mhii kwoınim Biıyan Inkam Komii siiram kisina haigi. Mi mhııya sima Adi Komii siiram ywo, simiir boinmauwım, diminin siya naingwowın sima tiram yayım krıma boınkıyım simiir, simiir kwoınim krimiiram wara mi inkin aingwokiyım. ⁶ Biıya Taitas siya ta mii aiir mirii bwakainakin, kimiir iikam nhirim simiir whinkinsiis haıgıniuwam, dimin taeminim hinda whısariıyar priihauuwım. Mi hiriinanki niıwi mi krıma siiramın wa swoki sriıgripkaii, kimiir whinkinsiis haıgıniuwam, ta mii aiir digiyam mi ta miıya wi iki iikam nhirim simı nwoki whinkinsiis haıgıniuwım. ⁷ Kıma ti om Korin hiran iikamım kima dimin taemin kasa bi tirkim. Mi kima sıyıu kibiki kibi iıırar tirkim. Mi kima iki iikam nhirim simiir sıyıu imiir asi haıburgım kima Adi Komii siir yai aiıramar naingwo tıbmii kııngım. Mi kimiirin sıyar whinkinsiis haıgıniugın siir yai imiir nınokninkinim mi simiirin iki iikam nhirim simiir nwoki boınmımauwım. Wım kima mii miıyık miriıyamar naingwokwonanaeikım. Mi kima krimiıramar mi aıngwokwonanaeikım. Dimusi rani, wım kima ini kima iikam ywowım

wim kima Adi Komii siiram naingwokwonanaelkim mi siir iikam ikim. Krira kimiiramin hiriinanam warar mi aingwowi kima dimin taemin nhirim siir mii aiir warar mi priihauuwim.

⁸Krira kimiiramin siyiu komii bi winkikin, kima siir wakaeyokna apamin. Kara kimiir bidiyar iki iisiimauuwim iikam nhirim umir iki iikam nhirim simiir hauuwan daingwo. Kara kimiir kwoin imiir boinworwokai haiginiugin, ti kara winkiyim kimiiram, iki iikam nhirim simiiram mi kara wa nwoki inokninkinim, kima iikam nhiramin ina naingwokwonanaeyim, iyie? Niingaka. ⁹Kara kimiir kwoinim simiirin dimusi boinworwokai rani, kima dimin kibi kibiyim krimiir Biyan Inkam Komiiyin Jisis Kraisi siya tirim simiirin bidi yinomokninkin digim. Siya digworaekwo hoimgakakar nwokin iya siya Adi Komii saika nwowin. Mi siya digworaekwowim simiirin digiumii ha haimriiyugigin mi siya ini inkamin digworaekwo karamaeyin ini siir hiriinanar yamwoiun. Siya inkamin dimin taemin karamaeyin siir hiriinan whisari bi nwokin, kimiirsika. Mi kimiirin wi siyar whinkinsis haiginiuwu Adi Komii siir dimin miyik miyikim simiir haiyam. Mi kima wi siir mii kibi kibi imiirarar mirii iski iki iikam nhirim simiir whinkinsis haiginiuwim.

¹⁰Mi yio kariir kwoinin ti dimin taemin imiirin pi hiniina boinkii, kimaigim iikamim yipiki umir iripa haingiriyu haiginim Adi Komii siir iikamim om komii Jerusalem hir nwowim simiiram. Wim kima ta hiriinana iki biwiyin namkiyin si tirbwakainakim mi an kara ha naingwowi, kima ta miya bii kima tira sair mi digi, wi wadiyar mi owi. ¹¹Mi tariinanin kima umirim iripar ti swoki haingiriyu haigin mi ta biya kima niki tira ya ti digi. Mi biigi biyarin, iya kima umir iripar haingiriyu haigina, kima ta mii aiir miriyamin pranae pranae bi naingwokwokim. Mi tariinanin ti dimin taeminim kima tirim umir niugugusim kima haingiriyu haiginim yim ti digi. ¹²Mi inkamin siir kwoin komiiyin umir digworaekwo Adi Komii siir hauuwam naingwowin mi Adi Komii siya wi siiram swoki srii rani, dimin taeminim siya nonkwo karamae nwowim simiiram. Adi Komii siya wi diminim siir hir nwowim siya hauuwanim wi simiirarar haii.

¹³Kara kimiirin hiriinan bi boinkikin, iki nhirim simiir whinkinsis haiginiuwim hiniin, sima wi wadie hiriirar nwoki owim mi wim kima niinga nwowi mi wi hikak niki owim. Niingaka. Kara ha naingwowi, kima hirii hiriinankinar dwo. Mi kara minam naingwowi, ti hiriinan siyiuin siirar dwo. ¹⁴Kara ha naingwowi, diminim kima nonkwowim simiirin hinda haimii ara timi hauugi. Dimusi rani, tariinanin ta ii aiirarin kima umir kasaka nwo rani mi yim sima komii nonkwo rani. Mi mhoyiya sima komii mi onkwowi mi wim kima sapisap, kimiirin wi sima mi whinkinsis haiginiuwu. Mi ti hiriinan siyiuin, kima whiekakarim wi wadiyar sibgu owi. ¹⁵Adi Komii siir yayim yipiki Moseski si

winkiyim Yokwo Komiini yim ha boinkim, iikamim yipiki biya umir digworaekwo nae minim sim niki aokingugunankaiyim, mhoiia sima wi dimin sim whirmin whirminki swoki onaowid rani. Mi ti iikamim yipiki digworaekwo kwisuwa nonkwowim, mhoiia sima wi inkam paeprikabnan nwo rani sima wi digi digar nwowi. Iriig.

Pol siya wi yaeya inkam nhirim simiir nikropkii om Korina hiriirin.

¹⁶ Kara Adi Komii siiramin hiriayar naingwowi. Dimusi rani, Taitas siir kwoinin siya hiurworwokaigin. Mi siya waraur nitam asi swoki aingwokin, iikam kimiir whinkinsis haiginiuwam. Krira mi aingwowa kimiir whinkinsis haiginiuwam nitam, saiir hiriinan. ¹⁷ Mi krira siir sriiyo, kimiiram swoki itam kimiir kigniyam mi siya ini wadieyar mi owin krira siir kwoin iir bi kiyaiigo. Dimusi rani, siir kwoinin hiriayar naingwokin siya wa niti kimiir kigniyamin. ¹⁸ Mi krira kririir nomiiyauwin siirin warar yikropki Taitas saika namam. Mi iikamim Adi Komii siir piugana saiirim, omom kingiin kingiin nwowim simiirim, sima siir inig iir haigin idwokikim. Dimusi rani, siya Adi Komii siir yaiya saiir boinmimauwan inkam kibikin iki iikamim simiir. ¹⁹ Ta sasa rani. Niingaka. Mi Adi Komii siir iikamim sima siir warar mi imbingim krimaka namam, ti umirim simiir hainamam om komii Jerusalema hiriir. Mi krima ti hiriinan dimin imiir tirim mi iikamim sima wi Biyan Inkam Komii siir inig hainanprapraskii ti digworaekwowim simiirsi. Mi sima wa nwoki inokninkinim krima iikamim simiir whinkinsisam naingwowi ti dimin taeminim simiir tirim. ²⁰ Mi kama wi mintirao wi iki iikam nhirim sim pi boinisi ti umirim sima haingiriyu haiginim krima simiirin kipii yapii bi tirkim. Mi krira ti kririir nomiiyauwo sowiiram asi nikiugiko yipiko hinda tinda kriraka namano, dimin taeminim krira tirim simiir kigmimikam. ²¹ Krima dimin taeminim biya Adi Komii siir whwonkam ida wadie nwowim simiiraram naingwo rani. Niingaka. Krima hiriayar naingwowi, iikam whiekakim sima ta saiirin ina ninokninkinim ti krimar tirim krima wadiekinar tiri.

²² Mi hiriinanki niuwi mi krima krimiir nomiiyauin wi ti inkam nviso sowakar nikropkii krima siir bidi hidim, dimin taeminim siya hidim simiirin. Mi krima hiriayar ninokninkini, siya simiirin wadieyar tirkim. Mi tariinanin siya ina ninokninkinin, kima ini siyiu miyik imiir napim. Mi siir kwoin komiyyin ta miya saiiram nitam asi naingwokin saiir miriyyam. ²³ Mi iikam nhirkim kimiir srii hiniin, Taitasin siya yipikin. Mi kima simiirin hiniina boin, siya krimiir nomiiyugin, krima iripa mii kwiruwar miriigim. Mi inkam nviso yipiki wi saika ninkin iti sowiir warar ninkin boinkii iikam kimiir nini kignakiyam. Mi kima iki iikam nhirim simiirin wi ha boin, sowa krimiir nomiiyau wadieko. Adi Komii siir piugana saiir iikamim yipiki ti kingiinar kwowim, sima nimbingikim

warar nitam. Ti inkam nwisō Adi Komii siir mii aiir mīriigo iikam simiir whinkinsiis haiginiuwam mi Kraisiir inigni boinmimauuwam dimin taeminim sima tirim. ²⁴Mi hiriinankiniuwi, kima simiir kigriraowi ya tariigina ya min niisiimauuga, kima simiiram naingwokwonanaei. Mi kima ti hiriinan siyiu iir tiri mi mhoiia iki Adi Komii siir piugana saiir iikamim iki hinda tinda nwowim, sima ninokninkinkii, kima wadiekim, ta kara boinkiya simiir biia iikamim warauranim kimiir saiir hiriinan. Iriig.

**Umirim iikamim nu haimii Judia hiranim
simiir whinkinsiisin simiir boinka**

9 ¹Kima bidiyar yinokninkinim umirim Adi Komii siir piugana saiir iikamim nu haimii Judia hiranim simiir hauugi simiir whinkinsiisam. Mi hiriinankiniuwi mi kara kimiiram pi yokwo priedi winki rani, ti simiir boinkiyamin. Niingaka. Pi hinda harki haruwar kwaowinkii. ²Kara ina ninokninkinin, kima ti iikamim hiranim simiir whinkinsiis haiginiuwam tiri. Mi kara kimiir inig iir bidi hainan prapraskiyin mi iikamim Adi Komii siir nu haimii Masedonia hiranim simiirin hiniin bidi boinim. Krimiir nomiyauim Korin nu haimii Esia hiranim, sima iki biewiyin namkiyin, sima iikamim nu haimii Judia hiranim simiir bidi mi whinkinsiisim. Sima bidiyar yinokninkinim, kima iikamim hiranim simiir bidiyar mi whinkinsiis haiginiuwim ti dimin taeminim kima tirim simiir simiirsi, simiir kwoin imiir kisina haigiyam simiir wara ninkin tiram. ³Kara hiniinam naingwo rani, ti yai kibi kibiyim iikam imiir kara boinim kimiir, sima hindara priiyokaeyamim. Mi ta hiriinan saiirsika, kara krimiir nomiyauwim simiirin biyin kimiiram asi nikropkikim kimiir whinkinsiis haiginiuwam, kimiir umir imiir haiyam. Mi sima niti mi sima pa nwoki kigniyim wim kima bidi diriraerar haiginkwokinim. ⁴Mi nu haimii Masedonia tiran iikamim sima niti mi sima ha nini kignii, kima bi niki diriraerar haiginkim mi kara wi nidid prasae kin tani. Mi an kara hiriyar mi aingwowi, wim kima wa mi ididi. Dimusi rani, simiirin kara boinkin hiniin, wim kima kimiir umirim bidi haiyim mi bidi diriraerar haigin digim. ⁵Kara ti dimin imiir boinkiyin mi kara krimiir nomiyauim simiir bidi sriiyim, bi sima nitim, kimiir nini whindiriraerarniyam, wari umir imiir diriraerar haigin sasaukwokinam. Mi mhoiia kara nu haimii Masedonia hiran iikam simaka niti mi wa nini kigniyim bidi diriraerar haigin digwokinim. Mi ti iikam nhirim simiirin wi hiniina nwoki iisiimauuwim, ti digworaekwowim yim kimiir kwoinkar priinaingwo hauugim.

⁶Kima ti digworaekwowim simiiramim sibgu sibgu daingwo omok. Mi kima Adi Komii siirin haimiisima hauuwi mi mhoiia kima wi iriipi hiriinan haimiisimar mi haii. Yo ini inkamin numiran sasaeya

ninkiniyin ini siir hiriinan ywowin. Pi siya hoimgak yinkin karamae ywo mi siya pi hoimgak mi ingugu ae rani, pi hiriinan kwisuwar mi ingugu ae. Mi siya pi numir kwirkak airar yinkin digi mi siya pi hiriinan hoimgakar mi ingugu ae. 7Mi iikam kima irira nwonwira biyyin ti diminim kima tiranim simiiram in sibgu sibgu tiki aingwo omok mi simiirin mhoiyya tir. Umirim Adi Komii siir hauuwiyim kima simiirin hindara kipi naingwo kisisiir hauu kima umir digworaekwowim Adi Komii siir hauuwiyim kimiir kwoinim maingimaingakak warar dinkin oki mi Adi Komii siya wi ti hiriinan inkamin siiram naingwokwowi. 8Mi ti digworaekwowim, kima naingwowim kimiir kigriraowam iinokiinok yim wi Adi Komii siya hauuwi kimiirin mi yio ti sima sima rani mi siya kimiirin wi yaeya dimin miyikar swoki inkin hauugii kira nonkwowamin. Mi kima iki iikam nhirim simiirin wi simiir nwoki whinkinsiis haiginiuwim. 9Mi yayim inkamin yipiki biyya ta Yokwo Komii aiir winkiyin siya hiniina win boinkikin,

inkamin yipiki Adi siir yai aiir sibgu wakaeyokna apin mi iikamim yipiki niinga nwowim sim whinkinsiisin mi ti siyiu kibi hiriinanin siya tirin, sima wi siir siira naingwokwonanae kaigii.

10Adi Komiiyin yipiki sasaeya inkam nwirni hauuwi siya ninkinam, mi sima nae wi simiirsiyar mi haii mi siya kiriirin wi ti hiniin hiniinim sim hauuwi. Mi siya simiirin wi iwarigar mi tiri mi kira iki iikam nhirim simiirin wi simiir nwoki sibgu whinkinsiis haiginiuwim. 11Mi Adi Komii krimiir Wanin siya kiriirin wi dimin taemin miyik miyik kasa hauu rani. Mi kira iki Adi Komii siir iikam nhirim simiirin wi simiir nwoki whinkinsiisim. Mi mhoiyya krima niti, wari umirim kima haingiriyu haiginim simiir hainakiyam mi krima simiir nini hainakii mi krima simiirin wi iki iikam nhirim simiir hauuwi mi yim sima wi Adi Komii siir inig iir hainan prapraskii. Ti diminim kima tirkiyim simiirsi. 12Mi ti dimin kibi hiriinanin yipiki kima tiri, yio wi Adi Komii siir iikamim yipiki indim nwowim wi simiir whinkinsiis haiginiuwi. Mi ti kima kinsiis haiginiuwi simiir, sima sima rani. Kira simiirin wi warar timi tir haiginiu maingimainga nwowamin. Mi Adi Komii siir inig iir hainanam in. Dimusi rani, ti dimin imiirsika. 13Mi ti diminim yipiki kira tirim kiriir nomiyau imiir, yio wi simiir nisiimauuwi hiniin, kima Adi Komii siir yai imiiram in ha sibgu wakaeyokna apikim. Mi kima Kraisiir yayim simiir nanaakninkii haiginiuwikim. Mi sima ti umirim kima hauuwim simiir kigi mi iikam nhirmi mi hauu ikim mi sima wi Adi Komii siir inig iir hainan prapraskii. Dimusi rani, ti simiirsika. 14Mi mhoiyya sima kimiiram in wi pranae pranae naingwokwo rani mi sima wi Adi Komii siiram kwisboinkii, kimiir whinkinsiis haiginiuwim mi kimiir kigriraowim. Dimusi rani, kimiir kwoinim siya haurworwokaigim mi kima ti dimin iir asi tirkim. 15Ha wit, krima Adi Komii siir inig iir

hainani. Dimusi rani, siir yinisimin siya krimiir hauugikin. Mi dimin taeminim krima hauuwiyim yim siir yinisimin yipiki siya hauugiyin siir bi haiburgin. Iriig.

**Pol siya iikamim yipiki ha boinim aposel kamim
miiyik rani, siya simiir yai imiir nikidugin.**

10 ¹Kara Polkin, kariir kwoinin ha naingwowi, kimiir kwoinin ti kisina haigi mi ti dimin taeminim Jisis Kraisi siya tirim simiiram ti aingwo. Siya siir kwoin komiyyin siyamar bi naingwonakin mi siya iikamim simakan dimin taeminim bimbuiwi bi tirkin. Mi iikam nhirim hiranim yim sima kariirin hiniina boinkim, iya siya krimaka tirar niki owa, siya inkam inig karamaenan tirkin mi krimiirin yai ha boinmimauugin. Mi mhoiyya, iya siya om whir namwoiwuyim mi siya krimiiramin pi yokwoni winki. Mi siya krimiiramin pi igao yaiyar boinki ti digworaekwo imiirin. Mi hiriinanki niuwi mi kara kimiirin pi igao yai hiniina boinkii. ²Mi mhoiyya kara kimiir kigam niti mi kima wi igao yai kara boinam kipi tir kimiirin mi kara kimiirin wi igao yai boin tani ti dimin taemin imiirsyiyin, ti igao yai kara boinanim iikamim yipiki ha boinim, nim krima ti iikamim tiranim, nim krima dimin biyie biyieyem nuanim sim napikim. Mi iikam imiirin ti digworaekwo hiniinim simiir whinkinsisi haiginiuwikim. ³Mi ta miiya krima miriyya krima nuan digworaekwowim simiir bi napikim. Niingaka. Krima ini ti nu iirar nwowim mi krima ti Adi Komii siir mii aiir miriyyim, krima ti iikamim yipiki ti nuan digworaekwowim simiir napiyim simiiram mirii rani. ⁴Mi ti dimin taeminim Adi Komii krimiir Wanin siirim ti krima nonkwo miriyyim siir mii aiir yim ti nuin siir tiran digworaekwo rani. Niingaka. Nim Adi Komii siir kirieya mi siir dimin taeminim yipiki krimiir whinkinsisi haiginiuwiyim simiirarar nonkwowiyim Setan siir dimin taeminim yipiki iikamim siir wakaeyokna ap karamae nwowiyim simiir kwoin imiir haigi itikrikiuwim simiir nikwowaisiyam. Mi ta Adi Komii siir kirieya ya ini nhao, irim hipig nan ywowa yipiki iikamkim sim nonkwowiyim iki iikam nhirim simaka niniyam. ⁵Mi ti Adi Komii siir dimin kirie komii komiyyim ti krima nonkwowim, yim ini ti yai bibiyeyem nuan iikamim yipiki sima napiyim ini simiir haiburim. Mi dimin taeminim yipiki sima naingwowyim hiniin, simiir kwoinin ini simar kigirkakim mi sima Adi Komii siir paninsii yinokninkinsi. Mi ti Adi Komii siir dimin kirie komii komiyyim yipiki krima nonkwowiyim mi iikamim simiir kwoin nwoikaiyyim dimin taeminim, simiirin krima kiyai. Mi sima Kraisi siir yai kibi kibiyim simiir asi wakaeyokna api. ⁶Mi kima krimiir yai aiir sibgu wakaeyokna api mi mhoiyya krima tiriiginim yipiki nantamyiriyiyim simiirin wi ta kirieya sair kirieni nonkwoninwomwiir haiginiuwi.

7 Iikam kimiir kwoinim sibgu sibgu daingwo omok, ti digworaekwowim kima ha naingwowim yim wadiekim. Mi kimiir iikam nhirim warauranim yipiki ha naingwo tibmii kiinim hiniin, simiirin Krai siya bidi yimbingiyim siir yai imiir boinmimauuwam mi sima wi ti dimin imiiram daingwo. Sima wi hiniina daingwo, sima Krai siirgim mi nim krma ti iikamim ti tiranim iriipi hiriinan Krai siirgim. ⁸ Mi Biiyan Inkam Komiiyin Krai siya krimiiram bidi kiwakiyin, siir igsoop aiir nokwokairinaowidam. Mi ti diminim krma tirim mi mii ikim, yim kimiir whinkinsiis haiginiuwankim wadie kima sibgu apam mi sima wi kimiir tirbu rani. Mi hiriinanki niuwi, kara krimiir inig imiirar swoki hainanaei, ti dimin taeminim krma tirim simiirsi mi kara wi di yididi hiriinan tirsiiyin kara wi maigimaigar pi ywowin. ⁹ Kara hiniina bi naingwokin, ta yokwowa kara winkiya kimiiram, kima ha naingwowi, kimiirin wi saeya kiyopsibgi haiginiuwi, kariirsiiyin hinda whisariiyar mi priiyididim. Niingaka. ¹⁰ Kara pi boriisopi kima kariiramim ti hiriinan kwoin iir naingwowim. Dimusi rani, kara ina ninokninkinin kimiir iikam nhirim, sima kariirin ti hiniina boinkim. Sima boin, ta yokwowa Pol siya winkiya krimiiram, siya krimiirin igao yai winboinkikin. Mi iya siya krimaka tir nwoyiyim siya pi krimiirsi nididi mi siya krimiirin hiriinan igao yai bi boinikin. Siir yayiyim yim ini niingar ywowim. ¹¹ Mi ti iikam hiriinanim yipiki ti hiriinan yai boiniyim, sima ti yayiyim kara boinmimauuwim simiir daingwo. Mi ti dimin taeminim krma winboinkiyim ti yokwo imiir, ta iya krma aruwar niki owa mi krma kimiiram niti kimiir kignakiyam, krma wi ti hiriinan yai kaimwowim simiirar swoki aboini.

¹² Mi krma kimiirin iki iikam nhirim yipiki sima simar nomboinyokainaeyim simiir hiriinan bi boinikim, krma iikam wadiekiwadie imairgim krma krimiir inig imiirar bi hainanaeikim, sima tira sair hiriinan. Mi iikamim ti hiriinan kwoin naingwowyiyim yim sima ha naingwowi diminim sima naingwowyiyim mi diminim simar kigiyin iki sima yapa yapa nwonira iriraka tiriyim yim wadiekim mi simiir kwoinim aowa aowa sima simarin ha naingwowi, sima wadiekim. Mi ti iikam hiriinanim yim pi whaowaei. ¹³ Mi nim krma wi ti miyiyim Adi Komii siya hauugiyim wi simiirarar hainan iski. Mi siya krimiir bidi yimbingiyim kimiir waraur miriiyamim. Mi hiriinankiniuwi mi krma wi iki mii nhirim krma mirii karamae nwoyim wi simiir wara hainan tani. Niingaka. ¹⁴ Dimusi rani, krma biigi biiyin kimiiram waraur nitkim Krai siir yai win kibiya sair boinmimauuniyam. Mi hiriinankiniuwi mi krma wi digar nwoyim kimaka waraur nini miriiyim. ¹⁵ Krma ti miyiyim yipiki Adi Komii siya nimbinim krimiir simiirarar mirii iski. Mi Adi Komii siya krimiirin minam nimbingin mii kimiir waraur miriiyim mi krma hiriinan tir karam nwoyiswo mi krma wi krimiir inig imiirar di hainani iki dimin taeminim iikam nhirim sim tirim simiirsi. Niingaka.

Krima minam naingwowi, kimiir naingwo tibmiiya Adi Komii siiram naingwo tibmii kiina saeya komii nwokiyim. Mi iriipi hiriinan ta krimiir miiya, krima nini miriini kimaka waraur ya wi komii nwoki okiyim hinda tindan. ¹⁶Mi krima hiriinan tiri, iki maeyau maeyauim kimiir kingiin waraur nwowin simiir nami mi krima wi miiyim iikam nhirkim miriigikim iki maeyau nhirim sim krima wi krimiir inig imiir hainan tani. Mi krima wi ha boin tani, ti miiyim yim krimiir miigim. Niingaka.

¹⁷Mi ta yaiya ta Adi Komii siir Yokwo Komii aiir nwowa ya hiniina boinka mi inkamin siir inig iirar hainanamar naingwowi mi siya wi Biian Inkam Komiiyin Adi Komii siir inig iirarar hainan iski siyairgin siir miiyim simiir bwamkibwamin. ¹⁸Mi tariinanin Adi Komii siya inkam nwirni inig hainani, yio tiriigin yio dimin komiigi komii ieyairgin. Mi inkamin siir inig iirar hainani, yio ti hiriinan diminin yio dimin pai rani, yio ini niingar ywowin. Iriig.

**Pol siya iikamim aposel inkamnan nwonamim simiir
siyu bibiyeyim simiir boinimninkiiigin**

11 ¹Kara minam naingwowi, kima ti yai hiriinanin simiir yai nhir imiir ti swoki wakae. Mi tiriiginim kara mi boinki windi inkam biyenan, kara ha naingwowi, kimiir wiinim ti yai imiiram mau. ²Adi Komii siya kimiiram naingwowi mi siya wi ti iikamim yipiki siirim nwowim simiirin wi siya nimbini mi sima wi hiri hiriinan siyu kinar nwowi mi ti hiriinan siyu kaimwowin Pol kara iikamim warauranim kimiiram naingwokim mi kimiirin kara bidi yimbiingiyim kima inkam nwiruwani nwowim. Mi kima mi siya, kima wi nwiruwar nwoiskii mi ti inkamin siir inigin Kraiskin. Kara minam naingwowi, kimiirin kara nikropkiyim Krai saika, wig kopaksim niinga yipiki kamaka iripa piu niki o karamae niki owa sair hiriinan. ³Mi tariinanin kara ti iikamim yipiki yai bibiyie boinim mi kimiir kiyaiiyim, biya mipugi si niksisaeaya mi siya hiira Ivni kwoinin si, siir hiriinan tirim ini simiiram swoki aingwokiyim. Kara pi borisopi ti dimin biyeyim kimiir kwoin imiir kiyaiiyim mi kimiir tirbuwim. Mi hiriinankiniuwu mi kima wi Krai siir siyu iir sibgu ap rani mi wi siiraram naingwo rani. Niingaka. ⁴Kara pi nididi. Dimusi rani, ti simiirsika. Mi inkam nwirin kimiiram niti mi siya kimiirin wi yaeya yai nini boinimmauuni Jisis siirin mi ti yaiyim ti krima boinimmauwim Jisis siirim kimiir, yim simiir hiriinan tani. Mi ti hiriinan siyu kaimwowin wim wi yaeya naeyiu whir haii. Mi yio ti Adi Komii siir naeyiuin biya kima niki haiyin kimiir kwoinaw waraur niki okaiyin yio si rani. Mi kima yaeya yai wakae mi ha naingwo tibmii kiini simiiramim mi yim ti yaiyim biya kima niki wakaeyim mi ha naingwo tibmiiyim, yim sim tani. Mi ti inkam hiriinanin kimiiram waraur niti mi kima siirin wi maigimaigra komiiyar mi owi mi siirin wa mi kigninkin

tiri ti dimin iirin. ⁵Mi an kara ha naingwowi, kara wi dig nwo rani, ti kimiir kam imiir tirkiyim yipiki ha boiniyim hiniin yim sima Adi Komii siir aposel kamkim. ⁶Mi ti hiriinan kamim sima boinim yai miyik miyikim yim wi kariir nikwowaisii mi an kara ninokninkinam whaowae rani. Niingaka. Kara Adi Komii siir dimin taeminim ina mi inokninkinin ti simiir yai hiriinanim simiir nikwowaisiyam. finokiinokin krima ti dimin kiingi kiinin kimiirgi kimiirar niisimauugin.

⁷Mi iya kara Adi Komii siir Yai Win kibi aiir boinimauuwa kimiir, kara kimiiram umiram bi sriigin umir kariir hauuwim ta kariir mii aiirsi. Mi kara hiriinan mi srii karamae mi owin mi kara kimiir whinkinsiis haiginiuwamin, kariir iingar nonkwo miriyyin miyim, umir pi saiirsiya mi haii kara. Inkamin inig komiigak nwoyiyin yio ti hiriinan mii bi miriigin. Dimusi rani, kara kimiiram bi kiwakikin umir kima hauuwim kariirin mi kima ha naingwowi kara kimiirin miyik bi tirkin, aniya? ⁸Mi iya kara iikam kimakar waraur nwowa mi mii ha miriyyin mi iikamim Adi Komii siir pugana saiirim nu haimeii Masedonia hirarim kariirin umir sima hauugikin. Mi ti hiriinan siyiuin kara simiir dimin taeminim hinda whisariiyar priihaiwinkin. ⁹Mi ta iya, kara kimaka waraur miriyya, kara nae digworaekwowa bidiyar mi hainguguwin. Mi kara kimiiram umir nae minam bi sriigin kariir hauuwim. Niingaka. Kariir nomiyauim nu haimeii Masedonia hiranim simar ini hauuni dimin taeminim kara hainguguwim simiirin. Mi ti dimin taeminim biyar tirim mi ha nityokiyokiyim mi ini tariinanar yadigniyim, kara kimiiram bi sriigin. Kimiirin maigimaigra nwo karam sim nwoyim mi mhoiyya kara kimiiram wi hiriinan swoki sriimimin tani. ¹⁰Mi ta Krai siir yai kibiyim ti kariir kwoinaw tir nwokaiyim, kara kimiirin kaimwowa boinkii. Mi Grik hiran maeyauim simiir iikamim, simiir nwrki ha bi boinkim, sima wi umir kariir hauuwi ta miyya kara miriyya simiir hir saiirsi. Niingaka. ¹¹Mi kima hiniin dimusi naingwokim, kara wi kimiiram kiwaki rani, umir kariir hauuwamin? Dimusi rani, kara tari kimiiram naingwokwo rani, aniya? Kara kimiirin pi hiniina boinkii, Adi Komii siya ina ninokninkinin, kara kimiiram nhami nhami naingwokwo rani.

¹²Mi kara wi ti dimin taeminim biya karar niki tirim wi simiir swoki tirkiipkaii. Mi kara ti aposel kam bibiyeyim yipiki ha boinim, yim sima iriipi hiriinan dimin miyik miyik imiirar mi tiri, ti aposel kam krima tiriyim simiir hiriinan, simiirin wi kara nanaakninkii haiginiuwi. Mi sima wi simiir inig imiirar swoki hainan praprasa iki iikam nhirim simiir whwonkam idan mi wi ti hiniina boini, sima ti krima tirim simiir hiriinan tirikim. Mi kara hiniina naingwowi, ti diminim kara tiri, yio wi hiniina niisimauuwi, sima pi niksisaei. Mi ti simiir yayim yim wi naekak nwo rani. ¹³Tiki kam hiriinanim yim Jisis Krai siirgi aposel

kam tani yim sima niksisaeyan kamkim mi dimin taeminim sima tiriyim yimbi pi niksisaei. Mi simiir yaigiyayim sima pi simiir wara boininkii rani, yipi simiir kwoin hirirar haigi okaii. Mi sima pi iikamim simiir kwoin imiir kiyaii mi yipiki simiir kigi mi sima pa nwoki boinim, Kraisiir aposel kam kiingikiinim simaigim. ¹⁴Wi mouni haniin kipi siinkao simiirsiyin, yim tiriiginim yim kaimwo rani. Krima ina ninokninkinim, Setan siyairin siir kwoinin yipi kikintimdinuwi mi siya iikamim simiir kwoin imiir kiyaii. Mi sima pa nwoki aingwowim Adi Komii siir paekwosim miyikin siyairgin. ¹⁵Mi krima hiniina ninokninkini, ti dimin hiniinim yim Setan siya tirkim mi krima wi mouni haniin kipi siinkao, ti iikamim yipiki ti dimin taeminim siya tirim simiir napim simiirsiyin. Yim sima Setan siya tirim, simiir tirkim mi simiir kwoinim yipi pi kikintimdinuwi mi sima pi iki iikami kwoinim sim kiyai. Mi tiki iikamim yimbi ha nwoki boinim, sima iikam wadiekim sima dimin miyik miyik asi tiri. Simiirin hiriirar kigninkin tirki. Mhoiia Adi Komii siya simiirin wi ti hiriinan dimin bibiyeyim sima tirim wi simiirsi nonkwobumbuninkin haiginiuwi. Iriig.

**Mi iia Pol siya Adi Komii siir mai aiir miriyyin dimin
bibiyie kasa rani, siir kimpipisu haiginiuum.**

¹⁶Mi tariinanin kara kimiirin pa swoki boinkii, kima hiniin kipi naingwo kara inkam biyiekin. Mi kima ti hiriinan kwoin naingwowi, kara kimiirin minam sriii, kima kariir dikiunam, kara ti inkam biyeyin. Mi kima hiriinan tiri mi an kara wi kariir inig iirar hainan prapraskii, dimin whirin siirsi. ¹⁷Mi kara kimiirin wi Biian Inkam Komii siya boinim, wi simiir hiriinan boin tani. Mi kara kimiirin wi min boini, kima kariir inig iir hainan prapraskiyim inkam biyeyim sima boinim simiir hiriinan. ¹⁸Mi ti iikam hiriinanim yipiki simiir inig imiirar hainaniyim ti dimin taeminim sima tirim ti nuin siir tiranim simiiram mi an kara iripi hiriinan wi hiriinanar mi tiri. ¹⁹Mi iikam kima ha naingwowi, wim kima ti dimin taeminim ti kam bibiyeyim ninokninkin karamaeyim sima boinim kimiir, kima simiiram in maigimairga komiigakar nwowim, aniya? ²⁰Mi kima iikam imiiram in pa kiwakii, kimiir kwoin imiir kiyaiyam in. Mi wim kima pi simiir yai imiirar mi wakaeyokna api iki iikamim yipiki maeyaua mai biyie miriia sair hir nwowim sima wakaeyokna apiya iki gavmani kamim simiir yayim sair hiriinan. Mi kima simiir kiwakii, kimiir digworaekwo imiir haiyam mi wi simar digii. Sima kimiir kwoin imiirin niksisaeyayim sima boiniyim mi kimiirin pi simar kiyaii. Mi sima pi simiir inig imiirar hainan praprasi mi kimiirin wi simar kigriraowi. Mi kimiir yaimwo whwonkamim wi sima nobrombropi. ²¹Wim kima simiirin minam kiwawini, ti hiriinan dimin bibiyeyim kimiir tirim. An kara pi nididi, kimiirin ti hiriinan tirim.

Biiya krima kimaka waraurar niki owa, krima bidiyar mi ididim ti dimin hiriinanin sima tirin siir mi tirsiiyin, iikam kimiirin. Mi iikamim ti dimin taeminim ti sima tirim simiiram naingwowi simiir inig imiir hainan praprasi mi an kara iriipi hiriinan, kariir inigin wi simakar mi inkin hainan praprasi. Mi tariinanin kara pi inkamin ninokninkin karamaeyin pi siir hiriinan boini. Kara wi kariir inig iirar mi hainan prapraskii. ²²Mi ti kam hiriinanin ti hiriinan boinim, yim Isrelmi piugana Hibruana saiiir iikam ima. Mi an kara iriipi hiriinan Isrel simiir piugana Hibru hirana saiiirgisaairar inkamkin iki simiir hiriinan. Yim sima ha boinkim yim sima brougae Ebrahim waini yinneyim simiir yiniekim. Mi an kara iriipi hiriinan Ebrahim siir yinneyim simiirar yiniekim. ²³Mi sima ha boinkim, sima Kraisi ni miyan kamkim, aniya? Mi tapa kara kimiirin ini inkam whaowaeyin ninokninkin karamaeyin pi siir hiriinan swoki boinki Kraisi siir dimin taeminim kara tiriyim kara bimbiuwi bi tirikin, iki sima tiriyim ini simiir haiburim. Karaargin miyan inkam wadiyeyin simiir haiburin kara maeyaua mii biyie miriyya saiiir hirin ii kasakasa bi nwoakaigin. Sima inokininokin kariir kariira huugrimkripiikiikainanaekim, iiyim kara namnanaeyim idip idip ini simiir haiburim. Mi idgiuni kam ima mi ipimpara kariir, ii kwiruwa kwisuwa rani mi iiyim naoni piu kingiin kara nwowim ini simiir imiir haiburim. Mi kima hiriyyar naingwowi kariir kouin ini sima ywowim, aniya? ²⁴Mi Isrel simiir gavmanin siir inkam komii komiyyim inigakim sima kariirin idip idipin iriyyara yonkwo mi idgiuni sima mi ipimparim kariir idip idipin kamnwir iuur iriyyar kwiiya iyop ipimpar. Dimusi rani, kara Kraisi siir boinmimaugun. ²⁵Mi om komii Rom hiran inkam komii komiyyim sima kariirin idip idipin kwoima yonkwo mi sima kariirin inar mi ipimparim idgiuni. Dimusi rani, kara Kraisi siir boinmimaugun. Mi iigwira sima kariirin siyani mi kaiyimik mi kara pariiparii naowim. Mi siyayi aka kara ninkin okwomainainamim Solwara whii idopwoniya hir, idip idipin kwoima tir. Mi krima opar mi akiiyokiyokii. Mi ii kwoimim simiir ii kwira, opara kara nakiiyokiyokiiya niyya kwir mi nabieya kwir. ²⁶Mi ii whiekakim, kara ti siyuum tiriir nitiiyim mi hinda nami ikim simiir napyokiyokiigin. Mi ieyin opin ha niunaniiyin mi kariirin pariiparii siya kaiyipripuwun. Mi kam bibiiyeyim hii tauaeiyyim, sima kariiram nagwoprakai kaokim. Kariir tioam mi kariir digworaekwo imiir tauae haiyam. Mi kariirgi kariir piugana Isrel saiiir iikamim, sima kariiram tirkim kariir nipimparim mi kariir mi isomaowim. Mi iikamim Isrel simiir piugana saiiir karamaeyim yim sima iriipi hiriinan kariir nipimparim mi tirkim. Mi iyya kara om hir nwoiiyim iikamim simiir kwoinim pi kariir nipimparim mi nisomaowamar mi aingwowi. Mi iyya kara iki niimauin sai priiywokaeyamiyyin inkamki nwo karamaeyin siir mi owa, niimauan wraisuim kariirin sima mi piyimik aokiiyim pariiparii.

Mi iya kara whii komii solwara saiir whii bopwokibopwoniya hir mi owa, kara pariiparii pa mi okwomainainamin. Mi iikam nhirim Kraiis siir nomiiyaunan nwonamim miiyim kara miriiyim sima tirbuwim pariiparii. ²⁷Kara miriinanaekiyin mi ini kariir iga iin imar ywokiyim wiir. Mi nii niyim kara nhwo nib bi whwonkaigin, kara nhwo Adi Komii siiram kwisboinanaeikin. Mi ii nhirim, kara mhuigar mi aokin mi naemin karamaeyar mi okin. Mi kara opmirsim bi mi kinsinkaigin mi ii whiekakim kara nae kiimii bi mi inkiuguna aekin. Mi opuda kariir hugiyim, kariir piua pi nopnopa, nounoua mi kini. Mi kara yiuis miiyakak bi nwokin kariir piu aiir sibgu higriniuwamin. ²⁸Mi ti dimin taeminim yipiki ha niisiimauuwim kara miriiyim ti aposel kam niksisaeyim simiir haiburim ti sima sima rani. Inokiinokin kara iikamim Adi Komii siir piugana saiirim iki omom omomim sim nwowim simiiram pa mi aingwoyimyoki, sima ini tari wadieyar nasi tirim, iyie? Wadie tir tani. ²⁹Mi iya kariir nomiiyaum Kraiis siirim sima dimin biyie tiriyim mi kara simiirsiyin pi hikakar mi owi. Mi iya inkam nwirin, inkam nwirni kwoin kiyaiiyim mi pi dimin biyie ha tiri mi an kara saikar pi ioar mi owi.

³⁰Mi kara kariir inig iirar swoki hainan prapras ti dimin taeminim simiirsi mi mhoiia kara kariir inigin wi minsi hainan prapras, ti dimin taeminim yipiki iikam imiir niisiimauuwim hiniin, kara kiriekak bi nwokin mi kariirin dimin whiruwaki bi tirbumbukin. ³¹Adi Komiiyin yipiki Biiyan Inkam Komiiyin Jisis siir Adin, siir inigin wi komiigi komiiyar nwoyokiyokiikaeyami iinokiinokin. Siya ina inokninkinin, ti karar boinim kara bi niksisaekin. Kara miiyan inkam kibikin.

³²Biiya, iya kara om Damaskas hir nwowa mi inkam komiiyin nu kigriraowiyin Aretas nikiuwiyin siir Gavmanin siir inkam komii nwirin siya yimbingi kam nhirim hira om iir nidiyokiyokaiya saiir ano iir kaoraraowim kariiram mi sima kariiramin hirar waikao. Mi kara hiriir namkiswo, kariirin wi sima pi yonkwowinin mi kariirin wi maeyauwa mii biyie miriia saiir hir pi huigripkiikikaiyin. ³³Kariirin wi simar pi huigripkiikikaiyin, maeyauwa mii biyie miriia saiir hir. Mi kariir nomiiyaum, Kraiis siirim, kariirin kimidiniya nibni sima haigigi. Mi sima ha namim hiira yipiki om iir huuyokiyokaiya saiiram mi sima ti nib mwis haimii haimii whiiyim kimidiniya uridni yomboborugi mi kariirin ina yonkwo kiikiiraraokiyim nua hiriir. Mi ini karar yimbinainam budgiyin nua hiriir mi kara ina yun iwiskinamin. Mi kara ha haiburgigin mi ina yidamamin. Iriig.

**Pol siya nhwo ha whinin mi siirin dimin
taeminim Adi Komii siyar yiisiimauu**

12 ¹Kara pi kariir inig iirar swoki hainanprapras kripkaii. Kara ina ninokninkinin ti dimin taeminim yim wi krimiir whinkinsiis

haiginiu rani. Mi Adi Komii siya wi ha boini, krime wadiekim. Mi kara kimiirin pi min boinkii, dimin taeminim yipiki aowa nwokaiyim Kraisi siya niisiimauum kariir pi simiir boinkii. ²Biiya, biewi iuur whiiyim namkiyim mi taka iya kariirin Adi Komii siya kariir haiyin mi kariirin siya hainanainam omin siya nwowin kou hiranin siir hiriir. Mi kara bi sibgu inokninkin, siya kariir haiyin mi kariir hainanainamin koua hiriir. Mi tari kariir piu sasar namka, iyie? Kariir kwoinbudin siya ti niinainamin. Adi Komii sasar ninokninkini. ³Kara kimiirin pa swoki boinkii, kara ninokninkin tani, kariir piu saeya piyamisi ama, iyie? Kariir kwoinbud ieya. Adi Komii sasar ninokninkin iskii. ⁴Kara Adi Komii siir om hir nwowin mi ti dimin taeminim kara wakaeyim, kara pi kariir yaigar kaokwo boin tani. Adi Komii siya pi kariir kigninkinkii rani, simiir niisiimauum mi simiirin iikam kimiir boinmauum. ⁵Mi ti dimin taeminim yipiki kara kigim yim wadie imairgim. Mi kara wi kariir inig iirar asi swoki hainanprapras: Dimusi rani, simiirsika. Mi kara hiniina naingwo rani. Kara ha naingwowi, kara kariir inig iirin wi dimusi hainan prapras tani, wi ti digworaekwowim yipiki iikam imiir niisiimauum, kiriekak nwo karam kara nwowim wi simiirsi hainanprapras. Mi digworaekwo whiekakim kariirin sima tirbuim. Kara inkam paeprikab niingakin. Mi Adi Komii siya kirie komiigakin. ⁶Mi kara kariir inig iirin wi dimusi hainan praprasam naingwo rani, wi dimin taeminim yipiki kara niisiimauum wi simiirsi hainan prapras mi kara wi inkam biyie ha nwo rani. Karar kigim simiirin, kara simiirin niksisa rani. Mi kara kariir inig iirar hainanim pi boriisopi. Dimusi rani, iikam kima wi ha naingwowi, inig komiigak inkamin karargin ti digworaekwowim simiir kou nwowin. Niingaka. Kara ha naingwowi kima ti dimin taeminim kara tirim simiiram daingwoki. Mi diminim kara boinim kimiir mi kima wi haini ninokninkini kariirin, kara inkam wadieki piyasi owin, iyie? Miiyik rani.

⁷Mi dimin taeminim Adi Komii siya niisiimauum siir omanim yim wadieki wadie imairgim. Adi Komii siya pi boriisopi kara kariir inig iirar swoki hainanim. Dimusi rani, ti simiirsika. Mi siya Setan siirin hiriinansi kiwakikin diminim kariir piu sairam nikropkiyim, ma kariir nii haiginiuam mi ti hiriinankiniuwi kara wi kariir inig iirar hainanpraprasnam naingwo rani. ⁸Kara Adi Komii siiram inidip idipin kwoima srii mi kariirin siyar mi whinkinsis haiginiu mi ti dimin biyeyin kariir piunau nwokaiyin yio ini siyar mi nhiinikriropkiyin. Mi sima kariirin ina kiwakiyim. ⁹Kara siiram inidip idipin kwoima srii mi siya kariirin idip idipin kwoima boin. Niingaka. Kara siirin wi kiriir warauranki hai rani kara wi kinakar nwowi mi tariigina ya wi digar nwowi. Mi iikamim yipiki kirie nwo karamae nwowim, kariir kirieya wi simiir whinkinsis haiginiuwi mi wi iikamim simiir niisiimauu

haiginiuwi. Mi tariinanin kara ti simiirsiyin maingimairga nwo karam nwo rani kara ini maingimairgar nwowin. Mi ini kariir inig iirar hainanpraprasin ti dimin taemin bibiyeyim kariir tirbuim simiirsi, yim kariir niisiimauugim kara kiriekak rani. Mi Kraisiir kirieya kariir mhi kwoinauin sasar nwokai. ¹⁰Kara ina ninokninkinin ta saiirin, ti dimin taeminim kara tirim yim Kraisiir inigin siir hainanprapraskikim mi kara maingimairga nwo karam bi mi okin mi biyie bi mi okin mi iikamim kariirin dimin biyie bi mi tirkin mi kariir bi mi kimpipisu haiginiugim mi dimin biyieki bi mi itkin mi kariir bi mi ipimparkin mi kara miyik bi mi okin yim tiriiginim yim dimin komii rani. Kara maingimairga nwo karam bi nwokin. Dimusi rani, kara ina ninokninkinin iya ti digworaekwowim sima nimbiam kirie nwo karamae kara nwowi, kariirin wi Kraisiyar whinkinsiis haiginiuwi mi kara wi siir kirie aiir haii mi wi wadieyar swoki owi. Iriig.

Pol siya minam naingwokin om Korin hiran iikam simiir whinkinsiis haiginiuim sima Adi Komii siir siyugi siyiu iir sibgu apim

¹¹Kara, kakananarin inkam biyienan boinkikin, kariir inig iirar swoki hainanpraprasnam. Kara hiriinanam bi naingwokin mi kariirin kima tirkin ti dimin iir tirim. Dimusi rani, kima kariir inig iir bi hainanprapraskikim mi iki iikam nhirim simiir bi boinmauugim hiniin, kara aposel inkam kibikin. Mi kara inig karamae nwokiswo mi wari aposel kam nhirim yipiki kima boiniyim hiniin wadiekim, sima wi kariirin dimin whirmin whirmin di swoki haiburi. ¹²Ti dimin taeminim ti kara tirim, kara kimaka biyie bi nwokin. Mi ti dimin taeminim yim kimiir niisiimauugim hiniin, kara Jisis Kraisiir aposel inkamkin. Mi dimin kirie komii komiiyim kara tirim kimiir, iki iikamim simiir niisiimauuim, yipiki simiir kigim mouni haniin sima siinkaowim mi Adi Komii siirin kimiir mi boinmimauuin mi kimiir mi iisiimauuin hiniin, Adi Komii siir kirieya ini kanakar nwowa. ¹³Mi Adi Komii siir piugana saiir iikamim iki omom omomim simiirim, sima ta yai aiir haiyim mi kara tari simiirin kara bi hauugin? Kara kimiirin minam bi sriigikin kariirin kima kigiraowim mi nae omaka minam. Niingaka. Mi kima ha naingwowi, ti siyiu hiriinanin yo ini kara mi priitirin mi kara kimiiram srii, kariirsi naingwobunam mi ti dimin biyeyim kara tirim kimiir, kima simiirin wi hindarar ti aingwo owouu iuguski. Dimusi rani, kara kimiir whinkinsiis haiginiuam tiri. ¹⁴Mi ya tariigina ya kwoimaka aeya kara boina kimiiram nitam, kimiir kignakiyam. Mi kara wi kimiir iikamim simiir dimin whir swoki priiyksasae hai rani, kariir whinkinsiis haiginiuamin. Niingaka. Kara kimiir dimin taemin imiir boriisopi. Kara ha naingwowi, iikam kima Kraisiirar dwo iski. Dimin taeminim yinisisim ima bi haiigim mi simiir yopii adim simiirin simiirsi bi

kigriraowikim. Dimin taeminim pi yopii ad ima haiyiskii mi yinisisimim simiirsiyin pi simar kigriraowi. An kara ini kimiir adnan ywowin Kraisiir dimin taeminim simiirsi mi wim kima ini kariir yinisisimnan ywowim. Mi kara wi dimin whir kimiir warauranki hai rani. Niingaka. ¹⁵Kara maigimaarga komiiga ti kariigi kariir umir imiirar mi igugusim kimiir whinkinsiis haiginiuam. Mi kara wi pranae pranae mirii rani, wi karar naobugi iki iikamim simiir kwoinbud imiir whinkinsiis haiginiuam. Kara kimiir whinkinsiisamin pranae pranae naingwo rani. Mi ti hiriinan siyiu kibiyin kara tirin, kariir digworaekwo imiir niugugusin kimiir yio siyiu wadieyairgin, aniya?

¹⁶Mi kimiir iikam nhirim yim wi ha boini, ihi, kira kaimwowar boini. Krima ina ninokninkinim, siya krimiir digworaekwo bi kaukiki haigin. Mi Polin yio niksisaeyaki waiwiigin. Mi krimiir kwoinin siya kiyagim mi siir yayim krimiirin ini sima ikwowaisikiyim, inkamin nae niimauan wraisuim simam kiyau haigingiyin simiir nobropam, ini siir hiriinan ywowin. ¹⁷Kima kariir boinmauugi, kara paniina tirkin, ha? Mi tari, ti kamim kara nikropkiyim kimiir kignakiyim mi tari sima? ¹⁸Kara Taitas siirin bidiyar mi sriiyin, kimiiram waraur mi itim. Mi siya bidiyar mi inkin itin ti siir nomiiyau nwirin, ti tir nwowin saika. Mi Taitas siya kimiir bidi yiksisaeyin mi kimiir dimin taemin imiir bidi mi priihai priihaiyim, iyie? Niingaka? Mi siya mi kara, krira tari Adi Komii siir naeyiun siir dimin taemin imiirara nap rani, aniya? Mi krira tari dimin whiruan siirara tir tani? Ti dimin taemin hiriinanim simiir sibgu aingwo omoki.

¹⁹Kara ha naingwowi, kima ta yokwo aiir mwaini mi kima wi ha naingwowi, ta yokwowa krima winkiya kimiiram, krima kimiir kwoin imiir kiyaiyam kinankiugika mi kima wi ha niki aingwowim krimiirin, krima wadiekim. Niingaka. Kariir nomiiyauim yipiki kara naingwokwonanaeyim, krima ti kamim yipiki Kraisiirim, Adi Komii siya ini krimiirar kigiyin ti dimin taeminim ti krima boinkiyim kimiir. Mi ti yayim ti krima winkiyim ta yokwo aiir, kimiir whinkinsiis haiginiuam, kima Adi Komii siirgisiir siyiu iirarar dap iski. ²⁰Krime ta yokwowa kimiiramin whisarii bi winkika, ti simiirsika. Mi kara ta sair saira naingwokwonanaeikin. Kara pi boriisopi, mhoyiya kara niti, kimiir nini kigniyam mi kara wi ha kipi nini kigni, kima ti dimin taeminim kara boinkiyim kima wakaeyokna apam, kima simiir nap rani. Dimusi rani, wim kima wi ti dimin taeminim kara tiranim kimiir whinkinsiis haiginiuam wi simiiram naingwo rani. Kara minsi naingwoyimiyoki, ti dimin taeminim kimiir waraur kara nini kigi simiirsi naingwoyimiyoknae. Mi iikamim irika nwirika niniinansaowi mi irika nwiraka nomboin ii ae karamae nwowi mi yai irika nwirika mi inii mi simiir piu imiiramar swoki aingwokwonaei mi isido whisa mi inibiiri mi yai bibiyie irni nwirni mi inikbumbuwi mi dimin taeminim hindara mi

priiboin priiboini, yaiyim iripa sibgu kitibmii boin karamae mi owi mi wim kima wi ti dimin taemin hiriinanin simiirar mi aingwo tibmii kiini. ²¹Kara ha naingwowi, mhoyiya kara kimiir kignakiyam niti, kariirin wi Adi Komii siya tirkii, kimiir whwonkam ida nitsi nididim. Mi kara wi iikamim yipiki kara nhinikriropktnatnoudninkiiyiyim wi simiirsi nouuboboini, iikamim yipiki Adi Komii siir piugana saiirin simiirin wi kara nhinikriropkii. Dimusi rani, sima dimin bibiyie hiriinanin sima tirim, sima simiirsiyin naingwoyimi yok karamaekim. Sima ini dimin bibiyeyim, iikamim hii priinanae prinanaeyim sima tirim simiir napikim. Simiir kwoinim ti hiriinanin dimin ima bidi yikpitmayim. Mi hiriinankiniuwu mi kara wi ti iikam hiriinanin simiir kig rani. Iriig.

**Pol siya om Korin hiran iikamim simiirin min boinkin
dimin taeminim sima napiyim sima sibgu mintirao.**

13 ¹Tariigina kara kimiir kigam niti ya kwoimaka aeya. Mi kimiir iikam nhirim sima simiir nomiiyauwim simiir nikbumbuwi mi kima wi ti yaiyim yipiki Adi Komii siya boinim, wi simiir wakaeyokna ap. Mi inkamim nwis nwoima mi kiritmai boinkii ti siirin mi sima wi sibgu danaakninkii haiginiugi. ²Kara kimiirin ti iikamim yipiki dimin biyie simiir iikam nhirim simaka tirim, pi simiir boinkii. Biya kara kimaka waraurar niki owa kwisaka, kara kimiirin igao yai ti dimin taemin imiir boinkin. Mi tariinanin kara ti aru nwokiyin, kara kimiirin pa swoki boinkii. Mhoyiya kara kimiir kigam swoki iti, kara wi inkam nwirni swoki kiwaki rani, rirmiiya nwowamin, yipiki dimin biyie tirin mi naingwoyimi yok karamae ha nwowin. Kara kimiirin ti dimin biyeyim kima tirim wi simiirsi nonkwobumbuninkini. ³Mi kara kimiiram waraur niti mi iikamim dimin bibiyie tirim simiir nini onkwobumbuninkingigam mi kima wi haini ninokninkini kariirin Jisis Krais siyar boinkikin. Mi iiya siya kariir boinin, kimiir dimin bibiyeyim simiir nonkwobumbuninkinam mi kima wi haini ninokninkini, siir kirieya kimaka waraur nwowa sapisap rani. Niingaka. Saeya komiiga. ⁴Mi iiya Krais siya iikam krimiir hiriinanar mi owin, inkamim siirin ina mi hainamim paeyin hiiniya nirioninkinin, saika ha ninkin irinugiyim mi siya ina yaonamin. Mi tariinanin Adi Komii krimiir Wanin siya siir kirie komiia yipiki siir hidninsiin idwowin mi siya omwai ha swoki waiyan, saiirin siir bidi hauugiya. Krima mi Krais siya krima wi iripar haingiriyiu owi mi nim krima inkam kirie komiiyan tani. Mi Adi Komii siya krimiirin wi siir kirie komii aiir whinkinsis haiginiuwu. Mi mhoyiya krima niti mi krima wi siir kirieya saiir niasiimauwu iikam kimiir waraurin, ta krima hida kimiir saiir hiriinan.

⁵Kima, kima kimar hidnaei mi kima wi haini sibgu inokninkini, iyie? Niingaka, kima Krais siir yaiya kimiir kwoinau nwokaiya saiir wakaeyokna apikim. Mi kima tari ninokninkin tani, Krais siya kimiir kwoinau waraur

nwokaii, aniya? Mi kima siiram naingwo tibmii kiini, kima tira saiir hiriinan mi siya wi kimiir kwoinau kwirii idwokaii. Mi hiriinan tir karamae nnowi mi siya wi waraur nwo rani. ⁶Kara hiriyar naingwo tibmii kiini, kima ina ninokninkinim Krai Jisis siya krimiir kwoinau nwokaiyin. Krima iikamim yipiki niksisaeyim sim tani. Niingaka. ⁷Krma Adi Komii siiramin minam kwis boini, siya wi kimiir nwoki whinkinsiis haiginiuwim. Mi kima wi hiriinanki nwowi, iki dimin bibiyeyim simiir wakaeyokna apim. Krma siiramin ti dimin taemin hiriinanim simiiram bi sriigikin mi iki iikamim pa nwoki aingwowim, krma inkam wadiekim. Niingaka. Mi iikamim krimiirin hiriinan naingwowi, krma ini yikiigiyim, ya ta hiriinana ya dimin komii rani. Krma ha naingwowi, wari kima tirim yim ini ywowim, simiirarar dap iski. ⁸Kima ina ninokninkinim ta saiirin, krma wi ta yaimwokiayimwowa saiir dimin sim whir swoki kinkrip rani. Krma whinkinsiis haiginiuwanin diminin whirkiwhiruwairgin ya yaimwokiayimwo aeya. ⁹Mi kima Krai siir yai imiir wakaeyokna api, kima tira saiir hiriinan mi krma wi maigimaigra nwo rani, krimiir Adi Komiiyin siir kirieya iki iikamim yipiki dimin bibiyeyim sima napiyim simiir nonkwobumbuninkiniya saiir niisiimauuwim. Mi iikamim krimiirin ha naingwowi, krma ini inig karamae ywowim yo ti hiriinan mi owiyim, yi ini mi owin. Hinokiinokin krma Adi Komii siiramar srininaeikim, kimiir whinkinsiis haiginiuwam. Mi kima wi siir yai air nwoki wakaeyokna apim, kima tira saiir hiriinan. ¹⁰Kariirin inigak Adi Komii siya nnowaiginiugin, Adi Komii siir iikamim simiir grabim. Mi an kara kimiir tirbuwam tir tani. Mi hiriinankiniuwi, biyyin kima saiir mwain mi wi kima kimar swoki grabna, iya kara ti aruwa niki owin. Mi mhoyiya kara niti kimiir kigam, kara wi ta kariir kirie air nini tirni rani. Kara kimiirin wi hinda grab haiginiuwi. Mi kima wi wadiek wadie nwoki owim.

¹¹Ti kariir nomiiyauwim, krimiir yayiim ini dig ywokiym mi krma kimiirin pi hindara nokboinmamaigii. Kima dimin bibiyeyim simiirin digumii haimriiyugig mi kima dimin miyikim simiiraramar dinmiininkin iski. Irni nwirni dinan whinkinsiis ankinsiis mi kwoin whirua dwo mi iripa dingwomamair aekiyam. Mi Adi Komiiyin yipikin krimiiram naingwokwo nanaeyin mi krimiir whinkinsiis haiginiuwiyin, iripa krma nongwomamair aeyam siya wi kimakar nwowi hinokiinokin. ¹²Kima ti Adi Komii siir iikamim warauranim, kima irni nwirni dikboinmamair mi in min dinan ininkwo aninkwo.

¹³Mi Adi Komii krimiir Wanin siir pugana tirana saiir iikamim sima kimiir nikboinmamaigikin. ¹⁴Kara hiniina naingwowi, Biyan Inkam Komiiyin Jisis Krai siya kimiiram nwoki aingwobumbuwwim. Mi Adi Komii siya wi kimiiramar nwoki aingwokwo irkakim. Mi Adi Komii siir naeyuin siya wi kimakar nwowi, kimiir kwoinau waraur kimiir nomiiyaunan. Iriig.